



UNIVERSITÄTS-
BIBLIOTHEK
PADERBORN

Universitätsbibliothek Paderborn


**Vermanu[n]g an die geistlichen versamlet auff dem
Reichstag zu Augsburg/ Anno. 1530**

Luther, Martin

Wittenberg, 1530

VD16 L 6920

urn:nbn:de:hbz:466:1-33168



1334.

1. M. Luther an die Geistlichen zu
Augsburg 1530. Wittenberg. 1530

2 — " — von der Sophisten
Lügen u Grewel mit dem Fegfeuer

3 — " — Von Ehesachen 1530

4 — " — von eigener Gerechtig-
keit 1530.

5 — " — v christl. Gerechtigkeit
od. Vergebung v. Sünden 1530.

6 — " — Das Buch d. Weisheit 1529.

7 — " — Daniel

8 — " — Predigt wider d. Türken


9 — " — von Kaufhandlung und
Wucher 1524.

10 Joh Langer, Pred. zu Nürnberg

11 Luthers Briefe wegen W. Herrung.

ferum sua merita applicaret reperis ergo, plura vultus, qua
xtus volueris sacrificari suo nomine, vel sacerdotis
quasi Legatum Substituere & qm hunc actum & exequia
exercent, ad hunc in effectum non assensu & se reuertit
Sacerdotium xti. Semper ex hac velle cuius quod actus
Sacrificandi licet mala ea possit ut exeretis à Ministor
ut tñ à xto è bona optima, è n̄ illa vultus qua p̄cipit
Sacerdotibus ut suo noc offerant, cogit nunc moratus offeras
illam sacrificiam bonam denominans, et si xtus p̄ illam veri
tatem sperare aut mereri non dicat, q̄a non è in statu merendi
An vero possit dici nunc q̄ illum orare et impetrare poterit
ex dicit de Pace xti in Tract de incarnac.

Dico 3do: xtus è tota hostia qua in hoc sacrificio
offeritur ita 3d. supra. Nec obstat quod xtus in throq̄ id est
in hoc et Omnis sacrificio hoc dicesse motum & Beati quia
hoc è tota mites hostiam idem q̄ qm actum sacrificandi, quoniam
una fuit cruenta, altera in altari incruenta, licet circa eandem
hostiam versetur, Hinc fassum è in missa è duo sacrificia Amicum
in quo solus xtus è victima, alterum in quo panis et vinum



Vermanung
an die geistlichen
versamlet auff dem
Reichstag zu Augs-
burg Anno. 1530.
Mart. Luther.
Wittemberg.

Psal. 2.
Et nunc Reges intelligite,
Erudimini iudices terræ.

Biblioth.
Coll. Theod.
Paderb. 2

An die gantze geistligkeit zu

Augsburg versamlet auff den Reichstag/

Anno . 1530. Vermanung Mars

tini Luther,



Nade vnd friede von Gott

vnserm vater vnd dem Herrn Ihesu Christo. Wie wol mir (lieben Herrn) nicht gebüret auff diesen Reichstag persönlich zu erscheinen / Vnd ob ich gleich erscheinen müste odder solte / doch nichts nutz da sein kundte / als an dem / inn solcher pracht vnd geschefte / nichts gelegen sein würde / So hab ich mir doch furgenomen / vber meine geistliche gegenwertigkeit (die ich mit ganzem meinem hertzen / durch gebet vnd flehen zu meinem Gott / vleissig vnd redlich / mit Gottes hülffe / beweisen wil) auch schriftlich vnd mit dieser meiner stummen vnd schwachen botschafft / vnter euch sein.

Vnd das darumb / das mich mein gewissen treibet / euch alle sampt / freundlich vnd hertzlich zu bitten / zu flehen vnd zu ermanen / das ihr diesen Reichstag nicht versemnet / noch vergeblich missebraucht / Denn Gott gibt euch gnade / raum / zeit vnd ursache / durch vnsern aller gnedigsten Herrn Keiser Carolo / mit diesem Reichstag / viel vnd gros guts zuschaffen vnd auszurichten / so ihr alleint woltet / Vnd spricht freilich izt / wie Sanct Paulus redet. 2. Corinth. 6. Ich vermane euch / das ihr die gnade Gottes nicht vergeblich empfalet / Denn er spricht / Ich habe dich inn der genemen zeit erhoret / vnd habe dir am tage des heils geholffen / Sehet / izt ist eine angenehme zeit / vnd ein tag des heils / fur euch am aller meisten / Vnd wir sehen vnd hören / wie aller menschen hertzen auff diesen Reichstag

Aij gaffen

gaffen vnd warten / mit grosser hoffnung / Es solle gut werden.

Solt aber dieser Reichstag (da Gott gnediglich für sey) on ende zurgehen / vnd nicht etwas redlichs ausgericht werden / Vnd alle welt nu lange zeit her / mit Reichstagen vnd Concilijs vertröstet vnd auffgezogen / vnd alle hoffnung gefeilet vnd vmb sonst gewest / ist zubeforgen / es würde ein verzweiffeln daraus komen / vnd iederman würde des vertröstens vnd harrens allzu müde werden / vnd das vergebliche lange gaffen / vngedult vnd böse blut machen / Denn es kan vnd mag lenger so nicht stehen / wie es igt stehet / sonderlich mit euch selbs / vnd mit ewrem stande vnd wesen / das wisset vnd fület ihr besser / denn ich euch sagen kan / So thue ich auch hiemit / was ich thue / euch zum besten / vmb friede vnd einigkeit willen.

Ob aber etliche villicht hierinn meine vermessenheit wolten sair ansehen / vnd fürgeben / Wer darff dein ? wer hat deins vermanens odder schreibens ihe begerd ? Es sind so viel gelarter vnd frumer leute hie / die der sachen besser zu raten wissen / denn du Narr / zc. Wolan / das wil ich gerne gleuben / Vnd Gott helffe das alles also war sey / Ich wil zewarten meine vermessenheit gerne gestrafft vnd verdampft haben. Aber noch ist das auch war / Man kan des guten nicht zu viel thun / vnd hat oft ein Narr bessern rat geben / denn viel weisen / Vnd widderumb / weise leute gemeiniglich den grosssten schaden auff erden gethan / sonderlich / wenn sie sich auff ihre weisheit verlassen / vnd nicht auch mit Gottes fürcht gehandelt / vnd mit demütigem hertzen / vmb Göttliche hülffe vnd gnade gebeten haben.

Dauon alle Historien vol exempel sind / beide inn der schrift vnd aussen der schrift / Vnd wenn sonst kein ander exempel fürhanden were / mocht man es wol an ewrem eigen exempel spüren / denn ihr habt nu bey zehen jaren / inn dieser sachen ewer weisheit wol versucht / mit so viel Reichstagen / mit so viel ratschlahen / mit so viel tücken

tücken vnd practiken / mit so viel vertroöstung vnd hoffnung / ia auch mit gewalt vnd zorn / mit mord vnd straff / das ich mein wunder vnd iamer an euch gesehen / noch hats nirgent dahin gewolt / da ihrs gern hin hette / Das macht alles / das die weisheit on Gottes furcht vnd demütiges gebet / durch sich selbs hat wollen solche hohe grosse sachen meistern / vnd ist druber zu schanden worden inn ihrer vermessenheit / Vnd werdet ihr euch noch nicht fürchten vnd demütigen für Gott / das ihr das drewen vñ die rachgyr nach lasset / vnd Gott mit ernst vmb hülffe vnd rat bittet / so solt ihr noch nichts ausrichten / vnd weret ihr gleich all zumal so weise als König Salomo / Denn da stehet die schrift. 1. Petri. 5. Gott widerstehet den hoffertigen / Aber den demütigen gibt er seine gnade .

Wir aber auff vnser seiten / beten mit vleis / vnd wissen auch die rechte weise zu beten / von Gottes gnaden / Sind auch gewis / das vnser gebet angenehme vnd für vns erhört wird / welchs alles beides (sorge ich) auff ewrem teil wenig thun mügen / Vnd haben auch nu angefangen mit ernst für euch zu bitten / das doch Gott der almechtige / einmal wolte ewer hertzen erleuchten vnd bewegen / sein wort zu fürchten / vnd demütiglich gegen ihm zu handeln. Angenehme ist solch gebet für vns / das wissen wir / Aber Gott helff / das ihr nicht halstarrig dawidder euch setzt / vnd vnser gebet sich widder keren müsse inn vnsern bossem / als bey euch verloren vnd veracht. Denn wir sehen / das der Teufel mit dem Türcken herzu wil / vnd erregt dazu eine rotten nach der andern / vnd wolts gern alles zu boden stossen / Soltet ihr denn auch noch verstockt vnd halstarrig bleiben / wie bisher / das were doch zu viel vnd allerding vnstreglich .

Vnd auffs erst / So darfft ihr von meinen vnd meiner gleichen wegen / nichts handeln / denn der rechte helffer vnd Ratherr / hat vns vnd vnser sachen so weit bracht vnd dahin gesetzt / da sie bleiben sol / vnd da wirs auch las-

21ij sen wollen

sen wollen / Das wir für vns / Keines Reichstages / Keines
rates / Keines meisterns bedurffen / dazu auch von euch ni-
cht haben wollen / als die wir wissen / das ihrs nicht besser /
ia nicht so gut / zu machen vermügt. Denn wir komen gleich
vnter Türcken odder Tattern / vnter Papst odder Teuffel /
so stehet vnser sache gewis / das wir wissen / wie wir glauben
vnd leben / wie wir leren vnd thun / wie wir leiden vnd be-
ten / wie wir genesen vnd sterben / wo wir alles gewarten /
holen vnd finden / vnd wo wir endlich bleiben sollen / nach
dem wort S. Pauli Roma . 8 . Den außserweleten schaffet
der geist alle ding zu ihrem besten . Solchs hat vns Gott
reichlich gegeben / durch Christum Ihesum vnsern Herrn /
vnd ist bereit an durch vieler frummer leut blut vnd marter
(von ewrem teil getödtet) bekand vnd bestetigt / Nicht das
wir vollkommen seien / vnd alles erlangt hetten / sondern das
wir die rechten regel (wie Sanct Paulus redet) den rechten
weg / vnd den rechten anfang für vns haben / vnd an der
lere ia nichts mangelt / das leben sey gleich wie es mag.

Aber für euch vnd für das arme volck / so noch vnt-
er euch gantz vnbericht odder ihe vngewis ist / da sor-
gen wir für / vnd wolten ihe gerne hie helfen / mit be-
ten vnd vermanen / das beste wir künden / Denn ich
furchte mir vbel / das ihr ewrs ampts vnd der demut
gegen Gott vergessen / vnd die seyten zu hart spannen /
vnd das willig pferd zu seer reiten werdet / damit widde-
rumb etwa sich eine auffrur erhebe / das beide wir mit euch
inn iamer vnd not komen / wie vormalts geschehen. Denn
ihr wisset noch wol on allen zweivel / wie vor der auffrur /
der Speirische Reichstag / mit so herlicher tröstlicher hoff-
nung ausgeschriben ward / das alle welt mit grosser
gyr gaffet vnd hertzlich wartet / es solte da gut wer-
den . Aber ewr ratschlag war da voller weisheit / vnd
verschuffs / das der selbige Reichstag stumpff / schimpf-
lich vnd schendlich ward abgekündigt / Da kam auch
flugs darauff die rute / nemlich der Nünzer mit der auff-
rur /

rur / vnd gab euch einen schilling / den ihr noch nicht vberwunden habt / vnd wir leider noch grossern schaden davon haben.

Das heisse alles mit gewalt vnd eigen sinn gefaren / Also zu Wormbs / muste das Edle blut / vnser lieber herr Keiser Carol thun / was ihr woltet / vnd mich mit meiner ganzen lere verdammen / welche ihr doch nu bisher selbs / inn vielen stücken habt heimlich angenommen vnd brauchet / Vnd ewer Prediger hetten izt nichts zu predigen / wo des Luthers bücher nicht weren / Denn ihr Sermon büchlin / vnd was vorzeiten auff der Cangel das geschrey war / lassen sie fein vnter der bandt ligen / vnd fahen an widder vns / vom glauben vnd guten wercken zu predigen / vnd der gleichen / davon man vorhin nichts hörete noch wuste / Vber das / erzwinget ihr dazu mal ein gebot / so greulich / vber die Lutherischen zu tödten / das ihrs darnach selbst nicht halten noch leiden mochtet / vnd muste zu Turmberg auff dem Reichstag geendert werden / Vnd etliche Fürsten / von ihn selbs dasselbige verbieten musten / wolten sie nicht selbs mit land vnd leuten inn fahr sitzen.

Dis erzele ich / nicht euch zum hon odder spot (denn ich bin sonst alzu hoch an euch gerochen) sondern euch hertzlich zu bitten vnd treulich zu vermanen / das ihr doch an ewer eigen erfahrung vnd vnglück lernen woltet / hinfürder das trogen vnd dreyen / gewalt vnd pochen zu lassen / vnd gegen Gott mit fürcht vnd demut zu handeln / vnd hindan gesetzt ewer vermessenheit / seine hülff vnd gnade mit ernstlichem gebet zu suchen / Warlich / warlich / die sachen sind zu gros / Menschliche weisheit vnd gewalt ist viel zu geringe dazu / Gott mus helfen / sonst wird vbel erger / das ist gewis / Denn so ihr auff ewrem trotz vnd pochen beharren wolt / so solt ihr wissen / das des Münzers geist auch noch lebt / vnd meins besorgens /
mechtiger

mächtiger vnd ferlicher / denn ihr glauben odder irzt begreiffen künd / Es gile euch mehr denn vns / wie wol er vns feinder ist denn euch / Aber wir haben einen trotz widder ihn / Gott sey lob inn ewigkeit / wolt Gott / ihr hettet den selbigen auch / nemlich / das reine wort vnd rechtschaffen gebet.

So wisset ihr auch / wie treulich vnd fest wir gehalten haben / widder alle rotten geister / Vnd wenn ich rhümen thürst / so wolt ich schier sagen / wir weren ewr schutzherrin gewest / vnd sey vnser geschafft / das ihr bisher seid blieben / was ihr noch seid / Vnd hetten wir gethan / ich sorgte warlich / ewr Selerten weren der sachen zu schwach gewesen / vnd solten euch die Schwermer vnd rotten bald ein anders geleret haben / der halben sind sie vns auch feinder / denn euch / vn̄ schuldigen vns / als die zu Creuzkriechen vn̄ widderuffen / Das müssen wir leiden / vnd das sprichwort erfahren / Wer dem andern vom galgen hilfft / den brecht der selb gern hinan / Die rotten buben hetten nicht wissen ein einiges stück widder den Papst an zu greiffen / Tu sie aber durch vnser hülff los worden sind / vnd essen vnser brod / tretten sie vns mit füßen / wie Christus sagt von seinem verrheter Juda.

Es werden aber etliche hie sagen / Ja das ist alles deine schuld / du hast angefangen / vnd das sind deine lere fruchte zc. Wolan / das mus ich leiden / weis wol / das man mir solchs nach sagt / Aber widderumb / weis ich viel frummer lente vnter euch / die da wissen / das nicht war ist / So stehet das werck alda am tage / meine starcken zeugen / das die rotten geister meine lere allzeit veracht vnd höher verfolgt haben / denn ewr lere / Vnd ich habe mich auch stercker müssen gegen sie setzen vnd herter weren / denn ich widder den Papst ih̄e gethan / Wie kans denn aus meiner lere komen sein / odder warumb ist nicht solch vnlust entstanden bey den meinen / da ich selbs teglich gepredigt vnd geleret / da es doch am ersten vnd höchsten solt vbelzuehen / wo aus meiner lere solch vnrat komen solt.

Habt ihr

Habt ihr aber vergessen/das der Deusch Adel zu
Wormbs/bey vierhundert stücken / Keiserlicher Maies-
tet fur trug/darinn sie sich beklagten / von der geistlichen bes-
schweret/vnd sagten frey heraus / Wo Keiserliche Maies-
tet/nicht wolt solchs abschaffen / so wolten sie es selbs
thun/denn sie kundtens nicht lenger leiden / Wie dünckt
 euch? Wo das were angegangen(wie es denn die auffrüs-
rer darnach anfiengen)vnd were nur ein prediger auff ges-
standen/der dazü geraten hette/Wo woltet ihr geistlichen
irrt sein? In bus Correptam/Tu war doch dazü mal meine-
lere im schwang/vnd hatte mit keiner auffrur angefangen
odder bis daher gelauffen/Sondern die leute fein geleret/
friede zu halten vnd der Oberkeit zu gehorchen / Vnd wo
sie nicht gewesen were / hetten gewislich der geistlichen bes-
schwerung sollen ein rechtspiel anrichten/Tu mus es meine-
lere gethan haben/Aber solcher danck gebürt mir / Beger
auch keines andern/So ifts allen Propheten vnd Aposteln
vnd Christo selbs gangen.

Item/habt ihr auch vergessen/wie zum ersten meine-
lere/fast bey euch allen/so ein köstlich ding war:da alle Bis-
schoff gar gerne sahen / das dem Bapst (der die stift zu
hart antastet)seiner tyranny ein wenig gesteuert würde/
Da kundten sie mir fein zu sehen/horchen / stille sitzen vnd
lauren/wie sie ihr Bisschoffliche oberkeit widder gang krie-
gen möchten/ Da war der Luther ein feiner lerer / der das
Abblas so redlich angreiff/Denn dazü mal mussten die Bisch-
offe vnd Pfarherr leiden/das ein Münch odder ein frembs
der böser hube mit den Abblas brieffen/inn seinem stift vnd
pfarr/durch vnd durch/eine schendliche schinderey treib/
vnd thursten nicht da widder mucken/Hie war kein Doc-
tor inn allen hohen schulen odder klöstern/der solchem vn-
flat hette wissen noch thüren begegengen/Vnd war Luther
das liebe kind/vnd fegete die stift vnd pfarren von solchs
em treudel marckt / Vnd hielt den Bisschoffen den steig
reiff/das sie widder auff sessen/vnd warff dem Bapst ein
B nen bloch

nen bloch inn weg/ Warumb war das auch nicht auffrührisch bey euch.

Vnd hernach/ da ich das kloster leben angreiff/ vnd der Münche nu weniger worden sind/ hab ich noch keinen Bischoff odder Pfarher hören drüber weinen/ Vnd weis/ das den Bischoffen vnd Pfarherr nie kein grösser dienst ist geschehen/ denn das sie der Münche also los worden sind/ Vnd besorge für war/ Es werde igt zu Augsburg kaum iemand sein/ der sich der Münche werde annemen/ vnd bitten/ das sie widder zu vorigem stande komen/ Ja die Bischoffe werden es nicht leiden/ das solche wanzken vnd leuse widderumb solten inn ihren pelz gesetzt werden/ Sind fro/ das ich ihren pelz so rein gelauset habe/ Wie wol doch die warheit zu sagen/ die Münche musten die kirchen regirn vnter dem Bapst/ vnd die Bischoffe nichts dazu thetten/ denn liessen sich Juncker heissen/ Tu habe ich doch die Münche nicht mit auffrur zerstöret/ sondern mit meiner lere/ Vnd gefellet den Bischoffen/ zettens auch mit aller künige gewalt/ noch mit aller hohen schulen kunst/ nicht vermocht zu thun/ Warumb halten sie denn das auch nicht für auffrührisch? Ey es gefellet ihn zu wol/ das die Münche herunter sind/ vnd damit dem Bapst schier ein ganze hand ab ist/ Vnd wissens doch dem Luther keinen danck/ des lere sie so herrlich brauchen inn diesem stück.

Vnd weil ich eben drauff kome/ das man vergessen hat/ wie es dazu mal stund inn der welt/ ehe meine lere anfieng/ vnd nu niemand wil nie nichts vbel gethan haben/ So mus ich die alten laruen ersfür zihen/ vnd den geistlichen ihre vergessene tugent für die augen stellen/ damit sie sehen/ odder widder dran gedencen/ was inn der welt solt worden sein/ wo vnser Euangelion nicht komen were/ Vnd wir auch zu vnserm trost/ sehen/ wie manchfeltige herrliche frucht/ das wort Gottes gethan habe. Vnd wollen anfangen eben an dem/ da meine lere anfieng/ nemlich/ vom Ablass.

Vom

Vom Abblas.

Wenn vnser Euangelion sonst nichts ge-
than hette/denn dis stück/das es die gewis-
sen von dem schendlichen greuel vnd ab-
got des Abblas/erlöset hat/so solt man doch
dran kennen/das es Gottes wort vnd

Krafft were/Denn das mus alle welt bekennen/das kein
menschliche weisheit solchs vermöchte/Sintemal kein Bis-
schoff/kein Stifft/kein Kloster/kein Doctor/kein Hohe
schule/ich selber auch nicht dazu mal/Vnd summa/keine
vernunft diesen greuel verstund noch kennete/viel weni-
ger/zu steuren noch an zugreifen wuste/sondern mustens
alles billichen/vnd fur gute heilsame lere gehen lassen/nam-
men auch die lieben Bisschoffe vnd Bepste/getrost gelt da-
von vnd lieffens weidlich gehen/Nemlich.

i Das sie das Abblas verkaufften fur die Göttliche gna-
de/so die sünde vergibt/Dadurch denn Christus blut vnd
tod verleugnet vnd verlestert wird/sampt dem Heiligen
geist vnd Euangelio.

ii Das sie die seelen dadurch aus dem fegefeuer felsch-
lich verkaufften/zu grosser schmach Göttlicher Maiestet
selbst/trug aber gelts die menge.

iii Das sie dadurch den Papsst zum Gott im himel setz-
ten/der den Engeln gebieten kundte/der pilger seelen/so
auff der Romfart sturben/gen himel zu füren.

iiii Das Euangelion/welchs doch das einige rechte Ab-
blas ist/musste schweigen inn den kirchen für dem Abblas.

v Das sie die ganzen welt vmb vnmeslich gelt dadur-
ch betrogen/vnd schunden mit vnverschamptem geiz vnd
lügen/als wolten sie widder den Türcken kriegen.

vi Denn sie imer die vorgeben Abblas brieffe niderleg-
ten vmb der newen willen/vnd huben imer den alten Ab-
blas auff inn den kirchen/vmb des newen willen/vnd spiele-
ten mit dem gülden iar/darnach sie gelt haben wolten/Ja
wol widder den Türcken.

h ij Vnd

vii Und ist auch die larue des gülden iars ein lauter
geticht vnd lose lügen/zu verderben den glauben Christi/
vnd das tegliche gülden iar Christi / Vnd doch vnzeliche
tausent seelen damit verfuret / vnd die leute gen Rom zu
lauffen schendlich generret/vmb gelt vnd gut betrogen/mit
verlorner mühe vnd kost dazu.

viii Das sie im Abblas verkauften gute werck der ganz
en Christenheit/dazu die absolution / als etwan sonderlis
chs/welche doch das Euangelion zuuor vnd imer dar / der
ganzen welt vmb sonst gibt/damit die gewissen vom Euan
gelio vñ von Christo / auff menschen werck verfuret wurde.

ix Das sie das Abblas höher lobeten / denn alle gute
werck der liebe.

x Das sie der heiligen verdienst/als vbrig für sie selbs/
zum scharz des Abblas legten/als were Christus leiden nicht
gnugsam zur vergebung auch aller sunden / welchs aber
mal den glauben an Christum verderbet.

xi Das sie zu lezt das Abblas so hoch huben/das sie le
reten/wenn gleich iemand die mutter Gottes beschlaffen
hette/so were es durchs Abblas vergeben .

xii Das sie lereten / wenn der pfennig inn den kassen
klänge/so füre die seele gen himel.

xiii Das man nicht rew vnd leide haben dürfft/das Ab
blas zu erlangen /Es were gnug/das man izt das gelt ein
legte .

xiiii Da Sanct Peter selbs nicht grösser gnade geben
kündte/denn das Abblas war.

xv Wo ist nu das vnmesliche gelt/scharz vnd gut hin
komen/das durchs Abblas so lange her / gestolen vnd so
schendlich erworben ist?

Summa/Wer wil alle die gewel erzelen/ die allein
das Abblas inn allen stifften/klöstern/kirchen/kapellen/klan
sen/altaren/bildern/tafeln / ia fast inn allen heusern vnd
kammern/vñ wo nur gelt war/als ein rechter gewaltiger Ab
got gestiftet hat? Man müste von newen an die bücher les
sen/die

lesen/die bey zehen iaren da widder geschriben sind. Tu
sagt an lieben herren/An dieser vnaußsprechlicher dieberey
vnd reuberey des gelts / vnd an solcher vnbegreiflich
en menge der verfürten hertzen vnd gewissen/vnd an sol
cher aller erschrecklicher grewlicher lügen vnd lesterung/
des leidens Christi des Euangelij/der gnaden vnd Gots
tes selbs/so durchs Ablass begangen ist/seid ihr geistlichen
alle sampt schuldig / nicht allein die ihr das gelt dauon
habt genomen/ sondern auch die ihr stille dazu geschwi
gen/vñ solchem teußfels wüten williglich zu gesehen habt/
Man sagt von auffrur/von klöster einnemen / von Türck
en/Ja was sind solche stücke alle sampt/gegen euch Ablass
kremer allein/wenn mans nur bedencfen wolt? Es ist ein
recht Türckisch heer gewesen/gegen den rechten Christlichen
glauben.

Welcher ist aber vnter euch allen/der für solch erschre
ckliche grewel/ihē ein mal busse gethan/ihē ein mal geseuff
zet/odder ihē ein auge nass gemacht hette? Ja ihr wolt
ist/als die verstockten/vnpußfertigen / nie kein vbelß ge
than haben/kompt nu daher/gen Augsburg vnd beredet
vns/der Heilige geist sey bey euch / vnd werde durch euch
(die ihr ewr lebrage nichts bey der Christenheit/denn scha
den gethan habt) grosse ding ausrichten / vnd darnach
flugs gen himel führen/mit allen solchen vngedüßeten/dazu
verteydigten greweln/als müste er ewer fro werden / das
ihr ewern Gott Bauch/so herrlich gedienet/vnd seine Kir
che so iemerlich verwüßet habt / Darumb habt ihr auch
kein glück / sollet auch keins mehr haben/ihē büßet denn
vnd bessert euch. Wol an/das ist der laruen eine/Also stund
vnd gienge es/ehe meine lere kam/inn dem stücke / Das nu
nicht mehr so stehet/ist schuld meines auffrürischen Euang
gelij. Dem Ablass folget billich der ander iarmarck / Confes
sionalia genant.

Von den Confessionalibus.

Bij Das

DAs waren die Butter briese / darinn der Papse
verkauft freyheit / butter / kese / milch / eyer / zu es-
sen / vnd macht gab / im hause Messe zu hören /
vnd sich inn verboten gelied zu verheyraten vnd
einen beicht vater welen / so oft er wolt / bey le-
ben / vnd inn todes nöten / von pein vnd schuld zuentbin-
den / vnd dergleichen. Lieber / war dis nicht auch ein lester-
licher iarmarckt inn aller welt / alles vmb gelt erfunden
Gerade / als hette Gott solche stücke alle / nicht vorhin dur-
chs Euangelion aller welt frey geschenckt / odder / als hette
es Gott verboten / vnd sie weren die Risen / die Gottes ges-
bot möchten vmb gelt verkeuffen. Das Euangelion musste
nichts sein / vnd Gott musste ihr kauffmanschafft sein. Diese
schinderey / iarmackt vnd lesterung / ist auch durchs auffrü-
rische Euangelion gestörzt / aber nu alles vergessen / vnd ist
kein Bisschoff odder Geistlicher / dem es leid were / odder
vergebung bedürffte fur Gott / Vnd hic war auch kein Bis-
choff noch doctor / der solchs hette gestrafft / sondern alle
geschwiegen vnd bewilliget / Wolan wir wollen auch zuse-
hen / ob Gott sich so wolle effen lassen / wie sie meinen.

Von der Beicht.

DA sind ewr bücher noch vorhanden / darinn ihr
die Beicht gesetzt vnd geleret habt. Welche ich
für der grosssten plagen eine rechne auff erden /
damit ihr aller welt gewissen verwirret / so viel
seelen verzweiffeln gemacht / vnd aller menschen
glauben an Christo geschwecht vnd gedempfft habt / Denn
ihr habt vns gar nichts vom trost der absolution gesagt /
welche das heubtstück vnd das beste inn der Beicht ist / die
auch den glauben vnd vertrauen an Christo stercket / Son-
dern / ein werck habt ihr daraus gemacht / mit geboten dur-
ch gewalt erzwungen / von den vnwilligen hertzen / ewr ty-
ranney zu stercken / vnd darnach engsten / martern vnd geif-
seln lassen mit erzelung aller sunden / das ist / mit vnmügli-
cher erbeit

cher arbeit/ruge vnd friede des hertzen ewiglich verstorret.
Wenn wolt ihr aber solche seelen alle her widder bringen?
vnd den mordlichen/grundlosen schaden erstatten? Sol-
che Beicht hat mein Euangelion auch zurecht bracht/vnd
die blöden gewissen widder gesterckt / Da kein Bisschoff/
Doctor noch hohe schule ichts von gewust/vnd izt widder
rew noch leide fur solchen iamer haben.

Von der Busse.

Das ist die grundsuppen vnd die helle selbst / Vnd
wenn man euch alle greuel vergeben vnd schen-
cken wolte/so kan man euch doch dis stück nimer
mehr vergeben/Dis stück hat die helle gefället/
vnd das Reich Christi greulicher verstorret/denn
der Türck odder die ganze welt ymer mehr thun kan. Denn
so habt ihr vns geleret/ das man solle durch vnser werck
gnug thun/ für die sünde/ auch gegen Gott. Vnd das heis-
set die sünde gebüßet/ Der rew vnd beicht / habt ihr nir-
gent so viel gegeben/wiewol ihr auch werck daraus gemas-
cht habt/Was ist nu das anders gesagt/du must für deine
sünde gnugthun/denn so viel? Du must Christum verleug-
nen/deine tauffe widder ruffen / das Euangelion lestern/
Gott lügen straffen/ die vergebung der sünde nicht glau-
ben/Christus blut vnd tod mit füßen treten/ den heiligen
geist schenden/durch dich selbst mit solchen tugenden gen-
himmel faren. Ach wo sind hie zungen vnd stimmen / die hie
von mügen gnugsam reden?

Was ist nu solcher glaube anders/denn der Türcken
vnd Heiden vnd Jüden glaube? welche alle sampt auch
wollen durch ihre werck gnugthun? Wie ist aber möglich/
das eine seele nicht verzweiffle / so sie kein andern trost
hat widder die sünde / denn ihre eigen werck? Dis al-
les künd ihr nicht leugnen/Ewer bücher sind vorhanden/
darinn

darinn nichts vom glauben / webber inn der beichte noch
busse geleret wird / sondern eitel eigene werck! Noch ist hie
kein Bisschoff noch geistlicher / der ein threnen lieffe fürs ol-
che gresliche / hellische lesterung Christi / Sondern sind rein
vnd sicher / schelten vns die weil auffrüer / vnd würgen die
Ehepfaffen / auch widder ihr eigen recht / ergern sich / das
die Lutherischen sich nicht stellen als fasteten sie / wie sie
thun / noch platten tragen / Vnd trozen dem ewigem Gott
dazu / vber alle ihr vnmenschliche bosheit.

Aus diesem grewel sind komen / vnd haben auch müs-
sen draus komen / vñ ist kein weren gewest / alle ander grew-
el / nemlich / so viel der klöster vnd stiftt eigen heiligkeit / mit
ihrem Gottes dienst / Die opffer Messen / Seggen / Vigilien /
Bruderschafft / Walfarten / Ablass / Fasten / Heiligen
dienst / Heiligthum / Poltergeister / vñ die ganze Procession
des hellischen creuz gangs / Denn wie ist anders möglich /
wenn sich ein gewissen auff seine werck sol setzen vnd baw-
en / so sitzt es auff einem losen sande / der reitet vnd rieset
imer fort / vnd mus werck suchen imer eines nach dem an-
dern / ihe lenger ihe mehr / bis das man zu legt den todten /
Münck kappen anzoch / darinn sie solten gen himel farem.
Lieber Herr Gott / wie solten arme gewissen thun! Sie mus-
sten auff werck bawen / darumb mussten sie auch so iemers-
lich suchen / vnd erhasschen / was sie finden kundten / vnd
inn solche tieffe torheit fallen.

Vber das / wurden durch solche schendliche lere / alle re-
chtschaffene gute werck / von Gott gestiftt vnd geordenet /
veracht / vnd gar zu nichte gemacht / Als / Oberherr / Vnter-
than / Vater / Mutter / Son / Tochter / Knecht / Magd / das
hieffen nicht gute werck / gehoreten auch nicht zur busse /
Sondern hies ein weltlich wesen / ferlicher stand vnd ver-
lorne werck / Also gar hat dis stück / beide Christlich vñ welt-
lich wesen mit fussen getretten / vnd weder Gott noch dem
Keiser gegeben / was ihn gebürt / Sondern ein new vnd ei-
gens ertichtet / das widder dis noch das ist / Vnd sie selbst
nicht wiss

nicht wissen/was es ist/weil kein Gottes wort dabey ist/
wie Moses sagt/Das sie den Göttern dienen/dere sie doch
nicht kennen. Vnd das war auch nicht wunder/Denn man
zu der zeit / auch das Euangelion nicht anders wuste zu
predigen/denn das man draus lernen solte / exempel vnd
gute werck/Vnd hat vnser nie keiner / ein Euangelion ge-
hört/das zutrost dem gewissen/zum glauben vnd trawen
auff Christum/gezogen were/wie es doch billich sein solte/
vnd wie es izt/Gott lob/widder gepredigt wird/Vnd war
also die welt im Euangelio/doch on Euangelion.

Das sie doch solch gnugthun für die sünde hetten weis-
lich vnterscheiden/nemlich also/das es geschehe gegen dem
menschen/nicht gegen Gott/wie Christus Matthei am sie-
benden vnd achtzehenden anzeigt/wie es vorzeiten auch
die lieben heiligen Veter gebraucht/vnd die Christen/so ge-
sündigt hatten/liessen dafür gnug thun / für der Kirchen
vñ den brüder/n wie es die wort mit bringen/das sie zwey/
drey, sieben iar/haben busse auff gelegt zc. So were Chris-
tus doch blieben/mit seinem gnugthun für vns / im himel/
Aber hiemit weren die Gottes dienst inn stifften vnd klö-
stern/vnd Ablass(wie droben gesagt)nicht auff komen/vñ
were dem grossen Gott/Bauch / nicht so viel zu gangen/
Darumb mussten sie es inn einander mengen / vnd zu letzt/
allein für Gott hinauff treiben/Wie wol dieser irthum von
anfang die Christenheit/auch durch grosse leute/als / Ori-
genem/S. Hieronymum/S. Gregorium/angefochten hat/
aber nicht so gar ins regiment vnd zu Gottes schul komen/
wie vnter dem Papsst geschehen. Denn dieser irthum ist der
eltest von anfang der welt gewesen/wil auch wol der iüngst
bleiben/bis an der welt ende. Wollen nu der selbigen erfol-
geten etliche stück erzelen .

Erstlich von der kauff Adesse / od / der zwynckel Adesse.

C

Hie wisset

NJe wisset ihr selbs / lieben herrn / welch einet
schendlichen trendel vnd iarmarck / ihr aus dem
Sacrament gemacht habt / Das ist ewer aller ge-
mein handwerck gewesen / das ihr teglich inn aller
welt / so viel tausent Messen vmb gelt gekaufft
vnd verkaufft habt / eine vmb einen groschen / eine vmb
acht pfennige / eine vmb sechs pfennige zc. Vnd hilfft hie
kein entschuldigung noch leugnen / Denn ob ihrs nicht ei-
nen kauffshandel habet genennet / So wisset ihr doch / das
inn der that nichts anders / denn ein kauffhandel gewesen
ist / Vmb gelt ist es geschehen / Ist nicht gelt da gewesen / so sind
die Messen nach blieben. Diese sunde ist allein so greulich /
das nicht wunder were / ob Got hette alle welt lassen drüber
zu Türcken werden / odder inn abgrund versinken / Vñ mei-
ner grossen verwunderung eine ist / das Gott hat mügen so
lange dulden / Es ist ein vnbegreifliche gedult / wie wol
der zorn sich nicht geseumet hat. Wolan / das habt ihr ge-
than / vnd so ist es gestanden bey euch / ehe vnser Euang-
gelion kam / dürfft euch nicht so seer schmücken / Es ist
am tage so fast / das euch selbs dazu mal dafür grawet /
vnd lieffet es gleich wol gehen / vnd muste keine newigkeit
heissen.

Itz wollen sich ewr gelerten putzen / vnd ziehen als
te Canones vnd Veter sprüch erfür / das die Messe ein
opffer bey ihm genennet sey. Putz dich liebes keglin / du
darffst wol / Wenn du lange Canones vnd sprüche fürest /
was hilffts? wir reden hie von den kauffmessen vnd
winckel messen / Vnd die Canones reden von der gemein-
nen odder Communicanten Messen / vnd treiben dazu heff-
tig auff's Communiciern / Das thun die kauffmesse nicht /
Vnd reimen sich mit der gemeine odder Communicant mes-
sen / gleich wie eine heimliche pfaffen hure / mit einer frumen
redlichen offentlichen brant. So gar fein wissen sie die
Canones zu führen / die hochgelerten. Vnd das noch viel fei-
ner ist / Die alten Canones scheiden das opffern vnd com-
municiern

communiciert feilt von einander / so mengen sie es noch
viel feiner inn einander / Denn im anfang der Chris-
tenheit / wenn man Messe halten wolt / hielten sie des
alten gesezes weise / vnd brachten die Christen erstlinge
auff den altar / von allerley fruchten / auch von milch /
honnig / epffel vnd birn ze. das opfferte denn der Prie-
ster / Wie Moses den Jüden gebeut / Da her das am-
pt auch lange hernach ein opffer geheissen / Aber dar-
nach gieng das Communiciern an / odder Sacrament
handeln / das heissen sie nicht opffern / sondern com-
municiern / Aber vnser Kauffmessen machen ein opf-
fern aus dem Sacrament / vnd lassen das communiciern
faren.

Hic mus ich nu mit euch / lieben herrn / reden / die ihr
schreiet / man solle kein newigkeit zu lassen / Saget mir / ist
die Kauffmesse nicht eine schendliche newigkeit? Warumb
habt ihr sie denn lassen auff komen / vnd schützet sie noch
izt? Ja wenn ihr hettet keine newigkeit sollen zu lassen / lie-
ber / was vnd wie viel würde man doch izt wol bey euch
finden / das inn den alten Canonibus vnd Vetern stehet?
Im eine nus schalen wolt ichs schier fassen / so doch da
gegen ewr newigkeit die welt erfüllet hat. Ich wil wol
mehr sagen / Was ist ewr kirchen stand vor vnserm Euan-
gelio gewesen / denn eitel tegliche newigkeit / eine vber die
ander / dazu mit hauffen / wie eine wolckenbruch herein ge-
rissen / Da hat einer Sanct Annan auffgericht / der Sanct
Christoffel / der Sanct Georgen / der Sanct Barbara / der
Sanct Bastian / der S. Katherin / der wol rüij. nothelffer /
Vnd wer wil allein solche newe heiligen dienst erzelen?
Sind das nicht newigkeit? Wo waren da denn Bisschone
vnd schreier / die solchs nicht solten zu lassen? Also wei-
ter / Einer richtet den rosen krantz auff / der ander / die krone
Marie / ihener / den psalter Marie / dieser zehen pater no-
ster steinlin an den thüren / dieser S. Brigitten gebet / der dis
Cij gebet

gebet ihener das gebet/vnd des on' alle zal vnd mas / vnd alle bücher vol/Wo war hie ein Bischoff odder Doctor/ der solche newigkeit doch hette ein wenig schel angesehen?

Also mit den walfarten/da giengen teglich newe auff/ zum Grüntal/zur Eichen/Birnbaum/zu Regensburg/Vñ so viel vnser liebe Frawen/Es war schier keine kappelle od der altar/es wolt eine walfart daselbs auffgehen/Vnd liefen die leute/als weren sie toll/aus dem dienst vnd gehorsam/das mans greiffen mocht / es were teuffels gespenst/ noch schwiegen Bischoffe vnd klöster/ vnd hohen schulen stille/Vnd were vnser Euangelion nicht komen / so were kein raum noch stet mehr zur walfart vbrig blieben. Vnd war das nicht ein sonderlicher meisterlicher beschiss / mit vnser Herrn Roef zu Trier:wie hernach die selbige schendliche lügen ist offenbar worden/Was haben alle Lutherische newigkeit gethan / gegen diesem einigen betrug vnd schalckheit: Aber hie war niemand /der newigkeit beschreien odder auch anzeigen kund / Sondern der Luther/der solche newigkeit anzeigt vnd strafft/der bringet neues auff.

Item/wie teglich vnd macherley vernewet sich wol das Abblas allein:wie mancherley newe bruderschaften richten Pfaffen vnd Münche auff / durch alle handwerck/ durch aller heiligē namen:teglich verkaufften sie briefe der bruderschaft/vnd gaben ihr gute werck vnd heiliges leben vmb gelt / verkaufften vigilien / iargezeiten / seel messen/ mit gepreng vmb die bahr/Etliche erfunden gülden messe/ etlich /die funffmesses/etlich der vnd der art messe/die auch keine zal hatten/Da von doch freilich nichts bey den alten Vetern funden wird. Ich wil hie schweigen / des heiligthumbs / Hilf Gott/wie gieng da neues vber neues / vnd darunter solche / grobe / greiffliche lügen / vom heiligen Creutz/von viel ganzen körper einerley heiligen/von vielen fingern/eines einigen heiligen/bis das man S. Franciscus nidderwad auch ehret/vnd frawen har / für S. Katherin har/Summa/es war hie kein ende noch mas/Das ihr selbst
ein

ein gelechter zu lezt darans machtet / noch giengs unges
strafft dahin / vnd kein Bisschoff / sahe hie etwas neues.

Wenn ich aber solt auff die Cangel vnd predigstül ko
men / da würd es erst recht grundlos werden / Da predigten
die Mönch teglich ihr neue gesicht / treume vnd gedanc
en / neue wunder vnd exempel / Vnd des auch keine masse.
Es war schier kein Mönch weñ er zwey odder drey iar ein
prediger gewest war / so macht er ein new sermon buch / das
musste denn eine zeitlang den predigstuel regieren / Vnd
ward die welt solcher bücher voll / Vnd war doch nichts da
rinnen von Christo vnd dem glauben / sondern alles von
vnsern wercken / verdienst vnd andacht / mit viel falschen
shedlichen exempeln / Wenn sie aber ihr bestes darinnen
theten / So war es von den heiligen anzuruffen / vnd ihs
ordens ia nicht vergessen / bis das sie das heilige edle mens
sch die iungfrau Maria / aller welt furbildeten als eine mit
lerin der armen sunder / auch gegen ihrem son Christo selbs
Denn wir wissen alle miteinander / vnd ich bin so wol darin
nen gesteckt als alle andere / das wir Mariam schlecht an
Christus stat vnd ampt zu halten geleret waren / Zielten
Christum für vnsern zornigen Richter / vnd Maria für vn
sern gnaden stuel / dahin all vnser trost vñ zuflucht stund /
so wir anders nicht verzweifeln wolten / War das nicht ei
ne gewliche newigkeit ? Wo waren hie Bisschoue / die sol
che neue lesterer vnd verrether Christi / strafften / die Chris
to sein ampt namen / vnd gabens Maria / die vns lereten
von Christo fliehen / vnd vns für ihm fürchten / als für dem
stockmeister / vñ vnser zuuersicht / die wir ihm schuldig sind /
als den rechten Gottes dienst / anders wo hin keren / Eitel
Abgötterey haben wir von den verrethern gelernt.

Dazu holffen die Doctores inn den hohen schulen /
die sonst nichts zu thun hatten / denn neue opinionones / einer
vber den andern / zu erdencken / Vnd es hette einer nicht
mit sonderlichen ehren mügen Doctor sein / wer nicht et
was neues hette auff bracht / Ihr bestes aber war / das sie

C iij die

die heilige schrift verachten / vnd vnter der bancf liegen
liessen / Was Biblia / Biblia: sprachen sie / Biblia ist ein Kes
ger buch / Man mus die Doctores lesen / da sind man es /
Ich weis / das ich hie nicht lige / den ich bin ia vnter ihn auff
gewachsen / hab solchs alles von ihn gesehen vnd gehört.
Scotus schreibt / das man aus der schrift nicht beweisen
kan / diesen artikel / descendit ad inferos . Occam / mein
lieber Meister / schreibt / das man aus der schrift nicht be
weisen müge / das einem menschen zum guten werck / Got
tes gnade not sey / Das sind die besten zween / Was solten
die andern thun? Ober diese alle gehet Thomas Aquinas /
Lerer aller lerer (sagen anders die Prediger Münche re
cht) der sagt frey / das Münch werden sey gleich so viel / als
getaufft werden / So sol man Christus blut vnd sterben
ehren / Noch ist das keine newigkeit / vnd er ist dazu Cano
nisiert vom Papsst vnd allen Bisschouen. Summa / es war
tamer vnd hertzeleid / mit predigen vnd leren / noch schwie
gen alle Bisschoue stil / vnd sahen nichts neues / die doch
izt eine neue mucken inn der sonnen sehen können. Vnd
stund also alle ding so wüst vnd wilde / für eitel vneinigen
leren / vnd selzamen neuen opinion / das niemand mehr wi
ssen kund / was gewis odder vngewis / was ein Christ oder
vnchrist were. Da lag die alte lere vom glauben Christi /
von der liebe / vom gebet / vom Creutz / vom trost inn trüb
saln gar darnider / Ja es war kein Doctor in aller welt / der
den ganzen Catechismum / das ist / das Vater vnser / zehen
gebot / vn glauben gewüst hette / schweige / das sie ihn solten
verstehen vnd leren / wie er denn izt / Gott lob / geleret vnd
gelernt wird / auch von jungen kindern / Des beruffe ich mi
ch auff alle ihre bücher / beide Theologen vn Juristen / wird
man ein stück des Catechismi daraus recht lernen können /
so wil ich mich redern vnd edern lassen. Noch musste dort ni
chts neues sein / dis aber mus neue sein.

Ja sprichstu / Diese stück sind nu angenommen / vnd im
teglischen brauch / Aber deines ist gar neue. Lieber / sage
mir

mir/wie alt ist wol Sanct Annen Abgott? wie alt ist der
Rosen Crantz/die Marienkrone? Wie alt sind der Bar
fussen pater noster steine/an den thüren vnd thoren vnd
inn allen winckeln? Wie alt ist die walfart gen Grímtal/
Regensburg/der Roß zu Trier/vnd der gleichen viel
mehr/waren sie nicht new für .xx. xxx jaren? Wer hielt
aber dazu mal widder die newigkeit? So lasse mein E/
uangelion doch auch so lange lauffen/Was gilts/es sol
auch alt werden. Ja dein new Euangelion ist wol res
cht/aber es hat eine sonderliche newigkeit an sich/die nis
cht leidlich ist/Welche ist die? Ey es thut schaden im beu
tel vnd inn der kúchen/sagen die Thumherrn zu Mag
deburg. Das laut/sprach ihener knecht/das were doch ein
mal gut Deudsch/das kúnd man verstehen/Zett ich das
vor gewußt/Warumb verlieren wir denn bis her so viel
wort? Wolan/so wollen wir 'hie im heimlichen Concilio
schliessen/Das newe lere heisse/was im beutel vnd kúchen
schaden thut/Alte lere heisse/was den beutel vnd kúchen
füllet. O lieber/nuschreibe vnd siegel zu/wir wollens auff
den Reichstag gen Augsburg schicken/vnd hören was die
Herrn dazu sagen.

Gott weis/das ich euch solchs zu vnehren nicht sa
ge/Mir ist an ewrem verderben nichts geholffen/ich wolt
lieber/es stünde besser vmb euch/Aber das kúnd ihr selbs
wol bedencken/wo ihr solche greuel vergessen wollet/dazu
euch noch schmücken vnd puzen/So werden leute vor
handen sein/die es nicht vergessen/Vnd werden vvilleicht
vnsauber gnug dauon handeln.Denn solcher vnverscham
pter freuel ist nicht zu leiden/das newigkeit heissen müste/
was ihr wöllet/Was ihr aber nicht wollet/müste nicht
newigkeit heissen/zu vnterdrucken die warheit widder ewr
eigen gewissen.Darüber würden wir widder zum anfang
der sachen kómen/vnd hernach erger mit euch wer
den/denn vorhin/Wie wol es erschrecklich ist/das man
für nimpt/solchen iamer zu bergen/vnd sich darüber noch
recht

rechtfertigen/vnd andere lestern vnd verfolgen/ Das wil ein zeichen sein/eins verstockten vnbusfertigen hertzen / vñ das ihr bald zu grund gehen müßet/Sintemal keine sünde Gott höher beleidige vnd verdreust/denn so man öffentliche bosheit leugnen/schmücken vnd bergen wil / wie Cain vnd Saul theten. Nicht so lieben Herrn/thut nicht so/ewr doch etliche/gebet Gott die ehre/bekennet das ihr inn solchen stücken vbel gethan habt/demütiget euch/so wird er euch erhöhen/bittet/ so wird ers euch vergeben/bessert euch/so wird er euch helfen.

Werdet ihr aber euch nicht demütigen / sondern solche stück wollen vergraben / geschwiegen / vngelüßet vnd vngestraft haben/Vnd darüber die armen Lutherischen noch verfolgen/vnd inn sinn nemen sie zu dempffen/Wolan/da wollen wir euch zu sehen/Gehet eine plage vber euch (als nicht anders sein kan) so gedencet daran / das ihr gnugsam gewarnt seid gewesen/Ihr solt die ersten nicht werden/die Gott vberpochen/das weis ich für war / Ich meine es ia hertzlich vnd trewlich/ob ich doch ewer etliche möcht bewegen/Weil ich hoffe/das noch etwa ein Lot oder zween inn ewer Sodoma sind/Die andern/die vnbusfertig bleiben/sollen nicht allein solche greuel nicht erkennen/damit sie doch mehr denn tausent mal den tod verdienen/sondern darüber auch die vnschuldigen(so solche laster vnd schande nicht wollen loben)würgen/ertrencken/hencken/verbrennen zc.wie sie denn redlich thun.

Es wil mir izt zu viel dings zufallen/Ich wil widder auff die winckel Messen komen/Vnd die greuel / die mir izt hiebey einfallen/sparen/bis ich sehe / wie ihr euch bessern/odder euch putzen vnd weis börnen wöllet / auff diesem Reichstage/So wollen wir denn komen mit ewr rechten farbe/vnd euch proficiat bieten/ob Gott wil. Von dem iarmarckt der kauff Messen/sey dis mal gnug. Nur wenn sie gleich nicht verkaufft/sondern auffs beste vñ vmb Gottes willen gehalten würde/dennoch leret vnd hieltet ihr sie
für ein

für ein opffer vnd werck/damit man Gott dienet/vnd bei-
de für vns vnd andere/sie weren lebend odder tod /für die
sünde gungthet/vnd das aller meiste für die todten / wie
wir alle wissen das die Messe schier gar für die todten/wid-
der das fegefeuer streiten must. Mein wey Bisschoff / da er
mich zum Pfaffen macht/vnd den kelch inn die hand gab/
sprach ia nicht anders denn also/Accipe potestatem sacri-
ficandi/pro vivis et mortuis / Das vns da die erde nicht
beide verschlang/das war vnrecht/vnd alzu grosse Got-
tes gedult. Die lebendigen hatten das dauon/das sie glaub-
ten/wer des tages eine Messe sehe/der were genesen/sicher
vnd selig/dis war der beste vnd gemeinste brauch der
Messen/Das könt ihr nicht leugnen / fraget drumb alle
kauffleute vnd was vber felt zihen muste/vnd alle frume
burger vnd burgerin inn stedten / zum wenigsten von der
Korate Messe.

Ist das nicht eine erschreckliche newigkeit: Sagen ni-
cht ewr alte Canones Apostolorum/Niemand solle bey der
Messe sein / der nicht communiciern odder das Sacra-
ment nicht mit empfangen wil / hats nicht Christus einge-
setzt zu empfangen/vnd sein da bey zu gedencen/den glau-
ben an ihn zu stercken/da er spricht / Solchs thut zu meis-
nem gedechtnis. Ihr aber schweigt solchs gedechtnis / laßt
sie es nicht thun noch empfangen/leret vnd vermanet nicht
zum glauben/wie es Christus eingesetzt hat / laßtets damit
bestrichen sein/das der beystehet/habe die Messe gesehen/
die ihr die weil heimlich opffert/Vnd laßt also dem armen
zuseher/die lügen vnd falsche zuuersicht im hertzen bleiben/
als habe er wol gethan / mit seinem zusehen / vnd nichts
vberal des Sacraments/wedder leiblich noch geistlich ge-
neussset/wie es doch Christus haben wil/vnd seine Apostel
nach ihm. Ich sag es noch/Ihr klaget/das man euch stifft
vnd klöster güter nimpt/Man solt vmb solchs gewels vñ
lesterlichen misbrauchs willen der Messen/mit stifften vñ
klöstern vmb gehen/wie Josias der König Juda mit den

D Altaren

Altaren zu Bethel umbgieng / das nicht ein stein auff dem andern bliebe / das were billich vnd recht / wo ihr euch hie rinn nicht bessern wollet.

Ihr schreiet / Was ist doch gutes aus der neuen lere des Luthers komen? Ich mus euch widder fragen / Sagt mir / Was ist auch gutes bey euch blieben? Nicht ein stück habt ihr vnuerderbet gelassen. Die Messe / vnsern einigen höchsten schatz / habt ihr (wie gehöret) mit vnzeligen abgöttereien vnd gewelen zu schanden gemacht / vnd den rechten Christlichen brauch mit füßen zutretten / den glauben verstorret / vnd das wort geschwigen. Die Tauffe ist bey den Kindern blieben / wie wol vngeschickt vnd vnleissig gnug / Aber so bald das kind erwachsen ist / vnd zur vernunft kommen / habt ihrs flugs erwürget / erger denn der Türcke thut / vnd ihm die tauffe widder genomen / durch ewer leidige / busse vnd werck lere / dadurch es lernet / seine tauffe / als durch funde nu verloren vnd zu nicht worden / zu verachten / vnd hinfurt durch seine eigen wercke / die seligkeit zu suchen / gerade / als were die Tauffe ein vergenglich menschen werck gewesen / gleich wie die Widderteuffer leren / vnd nicht ein ewiger bund Gottes. Sagt mir hie / was ist guts bey euch blieben? Ich wil schweigen / was guts daraus komen sey? So wir auch vnser Tauffe / Sacrament / Euangelion / Glauben / vnd Christum fur euch nicht haben können behalten / Denn ihr nichts rechts / sondern alles widder die Tauffe / Sacrament / busse gelert habet / das ist am tage.

Vnter dem Türcken ist doch das vorteil / das / wenn jemand getaufft ist / so leret man ihn ia nicht widder seine tauffe / sondern / das böse Türkische wesen vnd exempel ist ferlich vnd ergerlich / Vnd ob man gleich widder die Tauffe lerete / so ist gut widder zu stehen / weil der Türcke kein Christ / vnd bey einem Christen mit seiner lere veracht ist. Aber hie bey euch / ist nicht allein das exempel vnd wesen ferlich / Sondern ihr leret auch da widder / vnd stürmet mit worten vnd wercken da widder / vnd thut das vnter dem
namen

namen Christi/als die lieben veter der seelen/ vnd freunde
der Tauffe/das schneit/wie ein scharffes scher messer/wie
der Psalm sagt/Welchs klagt auch Sanct Peter vber euch
2. Petri. 2. Sie reden prechtige wort/da doch nichts hinder
ist/vnd reizen durch vnzucht zur fleischlichen lust/die
ihenigen/die **RECHT ERTRVREN**/waren/vñ nu
im irthum wandeln müssen zc. Das gut aber/so aus mei-
ner lere komen ist/ist/das solche ewer greuel vnd lesterung
alle an tag bracht vnd verdampft sind/welchs alzu viel
vnd gros gut ist/Wie wol noch viel mehr guts teglich
draus komet/wie folgen wird/Bey euch aber ist alles gut
verderbet/vnd nichts blieben.

Vom Bann.

Da wisset ihr auffs erst/den grossen raub vnd
freuel/das ihr den grossen Bann/genant Ex-
communicatio maior(welcher doch der weltlich
en Oberkeit zu stehet) zu euch gerissen habt/bis
das Bestste sich auch vnterstanden/Keiser/Rö-
nige vnd Fürsten ab zu setzen/vnd sich selbs weltliche
Keiser zu machen.Last euch sagen/lieben Herrn/das ist
nicht recht/Ewr Bann sol der kleine heissen/der nicht
die welt/sondern den himel zu schleust/vnd von der Chri-
stenheit vnd Sacrament sondert/wie Christus Matthei.
18. spricht.Halt ihn wie einen heiden zc. Vnd S. Paulus. 1.
Corinth. 5. Was gehen mich an die draussen sind zc. Wenn
andere stück solten gebessert werden/so müste man dis aus-
ch bessern/Denn Gott gefellet kein opffer od der dienst/so
vom raube kömpt/wie Isaias sagt.

Vber das ist der brauch des Bannes/vnd sol der sein/
das man die offentlichen laster straffe/als raub/ehbrun-
ch/hurerey/mord/hass/wucher/scufferey/item Ketzerrey/
lesterung vnd der gleichen/wie vnser Herr Christus leret/
Matthei. 18. Das der Bann solle gehen vber die/so
der Kirchen oder seiner Gemeine nicht gehorchen wöllen.

Dij So leret

So leret die Kirche ia nicht anders/denn Gottes wort zu
Tu sagt an/was ist guts vnd alts vom Bann bey euch blie
ben: Was ist hie nicht newer schedlicher misbreuche auff
komen: Ich wil Schweigen/das ihr vnschuldige frume leu
te für Kezer verbannet/verflucht/verdampft vnd erwürgt
habt. Der Bann ist nirgent zu gebraucht/denn das man
zins vnd schuld hat dadurch eingemanet/vnd manchen ia
mer vber arme leute angericht/Denn was die buben/Offi
cial vnd Commissarien hie für mutwillen geübt/das wisset
ihr zum teil/vnd wir wollen hernach (wo ihr auff diesem
Reichstag nicht dazu thut) euch solcher tugent einen Kas
lender stellen/das ihrs greiffen sollet/das wir ewren mis
brauch hierinn verstanden haben/vnd der ganzen welt an
zeigen.

Aber an dem ort/da der Bann solte seine rechte ma
cht vnd brauch haben/da ist er gar ein lauter Ablass vnd
eitel segen gewesen/hat gar nicht schneiden mügen/nemlich/
bey den Bisschouen/Tumherren/ia auch bey den Ppsten
vnd Cardinelen selbs. Wie wolt ich gerne einen Cononisten
Doctor hören/der mir wolt anzeigen/wie viel mal nach
den Canonibus vnd geistlichen rechten/der Ppst/Cardi
nal/Bisschoue/Pfaffen/stift vnd klöster/der Simoney vñ
ander vntugent halben/inn Bann verdampft/vnd verfluch
t sind/Wer helt sie aber bennisch: Die Declaration ste
het bey ihn/Vnd heist also/Im Bann ist/wen wir wollen
drinnen haben/Wen wir nicht wollen drinnen haben/der
ist nicht im Bann. So faret fort/lieben Herrn/Wenn ewr
willen sol das recht heissen/so kan auch die Christenheit/
wol solcher Bisschoue vnd Ppste geraten.

Vnd ich wolt gerne wissen/wo für man doch euch hal
ten solt. Christen wolt ihr nicht sein/Denn ihr wolt Chris
tus wort vnd ordnung nicht leiden/So wolt ihr Ppstis
sch auch nicht sein/denn ihr wolt die Canones vnd geistlich
en recht/viel weniger halten/als sie denn auch viel schwe
rer zu halten sind/denn das Euangelion/ Ist aber das ni
cht ein

cht ein seltsame new zeitung/das Bepstliche wollen nicht
Bepstlich sein: vnd geben sich doch für Bepstliche aus/
Wollen der Kirchen güter vnd regiment haben / allein zu
ihrem nutwillen/vnd nicht zu nutz der Kirchen / das sind
vngereimte sachen. Wolan/so seid Epicurisch vnd Tür-
ckisch ymer hin/das seid ihr doch gewislich / Aber weil ihr
denn ia Epicurisch seid / vnd doch so kleglich izt schreiet/
das man die klöster vnd stift güter so rappet / mus ich der
halben mit euch ein heimlich freundlich gesprech halten.

War ists/Gefellet mir auch nicht/das man solche gü-
ter so zu reist vnd zu strewet/ wie wol die Vnlutherischen
am allermeisten solchs thun/auch mehr danon haben/den
die/so man Lutherisch schilt/wie das wol zu beweisen ist/
Vnd sonderlich gefellet mirs vbel/wo es böse buben krie-
gen(wie ich wol weis)die es nicht verdienen/Denn welche
arbeiten vnd treulich dienen/da wil ich kein gewissen ma-
chen/ob denen etwas danon wird. Aber darauff wolt ich
mir gern antworten lassen / weil offenbar sind zweierley
Stift diebe vnd klöster reuber / welchs doch vnter diesen
beiden die ergesten billich solten genennet werden/ Als et-
liche eusserliche/etliche innerliche/Die eusserlichen sind die
bösen vnd vnwürdigen/wie droben gesagt/ Die innerlichen
sind/die Bisschoue/Tumbherrn/Münche selbs/die drinnen
sizen/nemlich die solche güter/zu aller vntugent vnd vnzu-
cht missebrauchen/vnd ihren gestifften stand vnuerscham-
pt vber treten/vnd grosse summen gen Rom/noch grösser
buben/danon schicken/ vnd die stift damit so schendlich
plündern.

Meinstu nicht/die Keiser/Könige/Fürsten/vnd herrn/
die solche Bistum vnd klöster gestift haben/wenn sie het-
ten damit wollen hurhenser/odder den Römern raub kir-
chen stifften/sie weren wol so vernunfftig gewest / das sie
sich anders dazu gestellet hetten/vnd ihr gelt vnd gut / ni-
cht hurn vnd buben/noch Römischen dieben vnd reubern/
zugeordnet. Weil denn nu inn stifften vnd klöstern/solche

D iij gefellen

gesellen sitzen/ vnd solcher güter/ die personen gebräuchen/
welche die stifter nicht gemeinet noch gewolt haben / vnd
sie also widder ihren willen vnd stiftung / solchs inne ha-
ben/ lesterlich verzereu vnd schendlich zu bringen/ vnd dar-
über im Bann vnd irregulares auffs höhest verflucht sind/
So sage mir/ welche die ergesten stift reuber vnd Kirchen
diebe sind? So wirstu den Papsst oben an sizē sehen/ sampt
Cardinalen/ Bisschouen/ Thumherren/ Ebtē vnd Mönch-
en/ Denn sie halten vnd thun nirgent das/ darumb sie gesti-
fftet sind/ sondern stracks das widder spiel/ als die vnfinni-
gen/ nemen vnd brauchen gleichwol der güter/ wie sie wol-
len. Ey lieber/ kanstu den splitter inn eines andern auge ses-
hen/ vnd schreien vber das zwacken der geistlichen güter/
So müste man dir die balcken inn deinen augen (die du ni-
cht sehen wilt) auch zeigen/ Kanstu eines sagen / so mustu
das ander auch hören/ anff das du wüsstest/ ander leute ha-
ben auch augen/ fülen auch/ riechen auch/ hören auch.

Wenn ihr nu fürgebt/ man solle euch das ewre nicht
nemen/ Freilich/ sol man euch das ewre nicht nemen/ Aber
ich wolt gleichwol ewrs geistlichen Rechts mit euch spie-
len/ dasselbige vrteilt/ verbannet/ verfluchet vnd setz eu-
ch abe/ vnd spricht/ Es sey nicht ewr / Deponatur heisst.
Denn ihr haltet nicht ewr stift vnd recht/ vnd habt damit
euch selbest abgesetzt/ darumb habt ihr die güter nach ew-
rem eigen recht lengst verloren / habt sie aber bisher / wie
die verdampften reuber/ mit freuel innen gehabt. Denn solt
man das verbum/ Deponatur/ per omnes personas decli-
niern vnd Coniugiern/ wo wolt/ Papsst/ Cardinal/ Bisschoff
vnd Thumherrn bleiben? Es würde gewis ein uerbum Im-
personale draus werden/ das kein person behalten würde.
Dünckt es euch aber billich/ das man gedult mit euch habe/
das ihr ewr recht nicht haltet/ So lassts euch widderumb
auch billich düncken/ das ihr gedult mit den habt/ die euch/
als den vnbusfertigen Simonistern vnd verbanneten reu-
bern/ die güter nemen odder nicht folgen lassen/ Weil sie do-
ch hie

ch hie ewer eigen Recht haben / das heisst / Deponatur / Al /
so geschehe denn ewer beger / das man euch das ewre lieffe /
das ist / die hurerey vnd büberey / Aber was nicht ewr ist /
das ist / die zinse vnd güter / nicht lieffe / Sondern als den
Reubern vnd dieben widder neme.

Niemand wil ich hiemit vertheydingt haben / Ein igli /
cher sehe für sich / aus was verdienst odder vrsachen er sol /
che güter brauche / Allein ich mache einen vnterscheid zwis /
schen der geistlichen gütern brauch / widder die schreyer .
Vnd sage noch / Wenn denn ia stift vnd klöster güter / sol /
len hinein gen Rom bösslich geraubt / vnd heraussen / schend /
lich mit hurn vnd buben / verzeret werden / vnd der stifter
meinung so gar feylen / so wolt ich noch lieber / das sie die
Keiser / Könige / Fürsten vnd herrn selbs heraussen behiel /
ten / vnd legten sie besser an . Weil das gewis ist / das die sti /
fter haben wollen damit versehen / frume / züchtige / Christ /
liche personen / nicht die da stünden vnd blöken / odder has /
bich trügen / sondern die da studierten / lesen vnd beten / das
mit man gelerte leute / künde daraus nemen / zu Bisscho /
nen / Pfarhern / Predigern / Schulmeistern / Cantzlern / Sch /
reibern zc . wie denn anfenglich vorzeiten geschehen . Tu sie
aber solche ampt vnd wercke lassen vnd verachten / ia spot /
ten vnd verfolgens dazu / vnd sind im bann vielfeltiglich /
So wolt ich nicht drumb weinen / wenn sie auch den sold vñ
zinse drüber verlören . Es heisst / Beneficium propter offic /
cium / Nicht aber beneficium propter maleficium / Das leret
ewr eigen Recht / vnd straffts mit dem bann auffss aller
grewlichst / vnd nennets / Simonias .

Sage mir nu / welcher Papst / Bisschoff / stift odder klo /
ster / hat bis her yemals / rew vnd leide darumb gehabt / das
sie solche officia haben lassen vntergehen / odder darnach /
getracht / das sie widder angericht würden ? vnd haben
dennoch solche beneficia gebraucht / Vnd also daher gele /
bt / zwifeltige Kirchen diebe / vnd duppel klöster reuber /
Denn sie nicht allein die güter innen gehabt / welche doch
auff

auff ander personen sind gestiftet/weder sie sind / Sondern
haben auch/der ganzen Christenheit / gestolen / geraubet
vnd gehindert/frume/gelehrte/Christliche Bisschou/Pfar-
her/Prediger/vnd der gleichen nörtige personen / der man
nicht geraten kan/vnd sie doch haben sollen geben / nach
meinung vnd willen der stifter/Lieber/die Stifter haben
nicht die officia gemeinet/das du einen langen rock / Kor-
hembd/platten tregst/odder Caseln vnd geweihte Kleider
anlegest/das können stöck vnd steine auch wol tragen/ Sie
haben leute wöllen zihen / der Christenheit zu trost vnd
heil.

Wenn ihr nu wollet hoch poltern / Man solle euch
die stift vnd klöster widder gentzen/vnd alles widderumb
einreumen/So sagt man euch billich widderumb / Lieben
herrn/gebt vnd gentzet zuvor widder / ewrn zwifeltigen
raub/nemlich/personen vnd güter/Die personen habt ihr
der Christenheit geraubt/Die güter/den stifttern gestolen.
Gebt ihr solchs widder/das die officia widder in schwang
komen/Wolan/so folgen euch billich die beneficia/Denn es
ligt der Christenheit mehr an solchen personen/wedder an
allen gütern vnd herrligkeit der ganzen geistlichkeit. Wo ni-
cht/so wirds nicht ein feine rechnung werden / das ihr al-
lein die ausgabe wollet berechen/vn die einname verschla-
gen/Man müste euch anders rechen heissen / vnd besser
auff die feust sehen/Ihr habt eingenomen / der herrn gü-
ter/personen damit zu halten vnd zu zihen/Wo sind die sel-
bigen:rechent her. Ja ihr seids/die auch die armen Knaben
schulen zurgehen lasset /das ia die Christenheit auff allen
seiten durch euch zugrund verderbet werde/allein das ewr
Epicurischer bauch wol stehe.Das wil ich darumb gesagt
haben/das man sehe/was die splitter richter dran gewin-
nen/wenn sie ihren vnflat rütteln.Darumb denckt vnd bit-
tet Gott/das er euch helffe auff diesem Reichstage / was
guts schaffen/Die sachen sind gros vnd schwer/vnd ligent
leider tieff versencket vnd verschlemmet / das menschen
Krafft

trafft vnd wize hie nichts schaffen mag. Der bann ist is
not/Aber Herr Gott/Er mus nicht mucken seygen vnd kas
mel verschlingen/Sonst wird nichts draus.

Die stücke von der Busse/Messe/Tauffe/Glauben vñ
Wercken/hab ich wol sorge/das sie bey euch zu hoch sind/
darumb ich wenig hoffnung habe / das ihr etwas reines
hierinn schliessen werdet/ Weil ewer gelerten selbs nichts
dauon verstehen/Vnd solche stücke on menschen zuthun/
allein durch Christum selbs vnd seinen heiligen geist/erhal
ten vnd getrieben werden müssen. Denn auch/ ausgenom
men das erste Concilium Act. 15. Kaum eines odder zwey da
uon gehandelt haben. Darumb wil ich weiter bitten/flehen
vnd vermanen/vmb die stücke/darinn man nicht sonder
liche erleuchtung des Heiligen geists darff/Sondern die
bey allen Christen/begreifflich vnd gewis sind / auch fast
durch vernunfft mügen erkennen werden. Vnd erstlich.

Von beider gestalt des Sa craments.

NJe wisset ihr ia wol/das die eine gestalt eine er
gerliche newigkeit ist/widder die klaren hellen
wort Christi/vnd widder der ganzen Christen
heit/alten langen brauch/wie euch das alles dur
ch viel schrifte ist gewaltiglich angezeigt/Denno
ch habt ihr grossen feinde aller newigkeit/nicht allein diese
lesterliche newigkeit angenommen vnd gehalten/sondern au
ch mit gewlichem wüten vnd verfolgen / aus lauter mut
willen/verteidigt/damit Gott auffs hohest versucht/ sein
wort gelestert vnd verdampft/Gott gebe/das ihrs wol büß
set/vnd ewren sinn seinem wort vnterwerffet. Ihr kunds
mit keiner schrifte erhalten/Solt ihrs denn mit lauter fre
uel vnd gewalt widder die schrifte erhalten / das wird zu
letzt nicht wol ausgehen/Vnd hilfft euch nichts / das ihr
für wendet/Man solle nichts newes machen/noch etwas
endern/Denn ihr habt gehört/das dis stück eine newig
keit

Zeit ist/vnd das ihrs seid/die eitel newigkeit vnd endering
inn der Christenheit/on vnterlas habt auffbracht /Vnd
was nach Gottes wort geendert wird/das ist keine newe-
rung/dem sollen alle gewonheit weichen/wie gut sie sind/
spricht ewer eigen recht. So ist Got vnd sein wort elter den
ihr seid/wird auch wol iunger vñ newer sein/denn wir vnd
ihr sind/Sintemal/es ist ewig/Darumb so sol es beide als
tes vnd neues endern vnd regieren/vnd sich widder vons
newen noch alten endern odder regieren lassen.

Ihr gebt fur/Man solle on willigung der Kirchen nis-
chts endern noch newern/Wer ist denn die Kirchen? Seid
ihrs! So zeigt siegel vnd brieffe/odder beweifets sonst mit
der that vnd fruchten/Warumb sind wirs nicht auch / die
wir so wol getaufft sind als ihr! leren/predigen / haben die
Sacrament/glauben /beten / lieben / hoffen / leiden / mehr
denn ihr/Odder seid ihr darumb die Kirche/ das ihr eitel
newigkeit auffbringet/Gottes wort darüber endert/lestert/
verfolget vnd mördet/dazu stift vnd klöster/als die Kir-
chen reuber inne habt: Ja des Teuffels Kirche seid ihr/die
selbige ist eine lägnerin widder Gottes wort/vnd eine mör-
derin/wie sie sihet/das ihr Gott/der Teuffel/auch ein lüge-
ner vnd mörder ist/Denn die rechte Kirche mus ia die sein/
die sich an Gottes wort helt / vnd darüber leidet / wie wir
(Gott lob) thun/vnd niemand morden noch von Gottes
wort füren/Darumb soltet ihr vns nicht viel sagen / Kir-
che/kirche/kirche/Ihr solt vns gewis machen / das ihr die
Kirche seid/Da ligets an/Der Teuffel kan auch sagen /Ich
bin Gott/bete mich an/Matth. 4. Der wolff kan auch sa-
gen/Ich bin hirte/Math. 7. Joh. 10. Wir wissen selbs wol/
das man der Kirchen solle gehorchen / Aber wir fragen/
Wer vnd wo sie sey!

Got helff euch/zur besserung in diesem artikel/Thut ihrs
nicht/So wollen wirs mit Gottes gnaden dennoch thun/
wie bis her. Vñ wil mehr sagen/Wo es Got schickt/das ihr
etwas nach lasset/auff diesem Reichstage/So wollen wirs
nicht

nicht der meinung von euch annemen/als sey es durch ewer
nachlassen nu recht/vnd bis her vnrecht gewesen. Nein/ihre
solt vns viel zu geringe dazu sein / das inn ewrem wiltore
vnd macht stehen solt/wenn vnd wie lange Gott warhaff
tig odder ein lügener/vnd wenn odder wie lange sein wort
recht odder vnrecht sein solle/Denn das were zu hoch gefa
ren/vnd nach Endchristlicher hoffart/euch vber Gott vñ
sein wort erheben/vnd alle vnser lere vnd than widder ruf
fen/Sondern wir wollens euch durch Gottes wort/abge
zwungen/vnd als den lesterern / verfolgern vnd mörderm
abgeiagt haben/das ihr euch für Gott demütigt/ewer sun
de/mord vnd lesterung widder Gottes wort bekennet vnd
bessert/als die bis her vnrecht gethan/Gottes wort verfol
get/vnd vnschuldig blut vergossen habt/Solche sünde vñ
laster/wollen wir vnuerborgen haben/vnd nicht mit stille
schweigen vnd decken darein bewilligen/vñ solcher greuel
vns teilhafftig machen/Oder wollen vollend hinan setzen/
was da ist/vñ wollens mit euch ausstehē/auff Gottes wort/
welchs ihr verfolget/Deñ wie ich im anfang gesagt/Bedür
ffen wir ewrs Reichstags vñ schliessens nurgent zu/Wir ste
hen/da wir stehen/on ewr zu thun/ia auch widder ewer to
ben vnd wüten/Sondern vmb ewren willen vnd vmb des
armen volcks willen/thun wir hiemit/was wir thun/ob wir
euch/odder ie etlichen aus euch/helffen vnd dem volck ras
ten kundten/Gott zu ehren/vnd der Christenheit zu nutz.

Vom Ehelosen stande.

Oelibatus/das ist der Ehelose stand/odder verbo
ten Ehe(wie ihr wisset)ist auch ewer Bepflichten
newigkeit eine/wider das ewige Gottes wort /vñ
wider den alten seligen brauch der Christenheit/
auch widder die creatur vnd schepffung Gottes
selbs / Damit ist erfüllet die weissagung Danielis . ii. da
er spricht von ewrem Könige / Er wird keines Gottes /
noch frawen liebe achten. Es mus ihe/ein grosses laster sein
E ij (frawen

(frawen nicht liebhaben) weil es der Prophet hie für ein sonderlichen grewel des Endechrists anzeucht/nehest nach der Abgötterey. Die alte translatio hat / Erit in concupiscentijs femininarum / Er wird inn frawen liebe sticken / Aber das were nicht ein Endechristliche tugent / sondern müste also sagen / Erit in concupiscentijs masculorum / wie wol er doch dasselbige auch mit meinet / wenn er spricht / Affectum erga mulieres non curabit / welchs der rechte text ist.

Vorzeiten habe sich die Thumherrn hierinn hart widder den bapst gesetzt Sondern die zu Wetz das sie zu Effort schri er ihre Erz bischoff het ten erschlagen / Vide Chron. Ger mante.

Du lieben Herrn / wolt ihr frum sein vnd wol thun / So zwingt euch inn diesem stück zur busse / vber alle den wüsten vnaußsprechlichen iamer / der vnzucht allerley gestalt / inn aller welt / welcher / aus dieser verfluchten Bepflichten newigkeit erwachsen ist / welche auch euch allen auff dem halse ligt vnd ligen bleibet / wo ihr nicht dazu thut vnd enderts. Ihr höret hie / das ein Endchristlicher grewel vnd plage ist / frawen liebe verachten / das ist / die ehe verbieten / Denn Gott hat / frawen geschaffen zu ehren vnd hülff dem manne / darumb wil er solche liebe vnuerbotten vnd vnueracht haben / Das fleisch vnd der teuffel / leren die frawen alleit zur vnehre brauchen / das man eine nach der andern zu schanden mache / wie bis her gethan hat ewr newer löblicher eheloser (ich hette schier gesagt / ehrloser) stand / vnd noch thut / Das heist nicht frawen lieben / sondern vnzucht vnd schande an den frawen lieben vnd suchen / vnd sie nicht / wie frawen / sondern / wie hurn / halten vnd achten / das sie hinfurt niemand lieb noch werd haben mag / Aber Gott wil / das man sie halte vnd achte / wie frawen / vnd thu das gern vnd mit liebe / Das ist / ehelich sol man sie haben / vnd mit ehelicher liebe bey ihn bleiben. Das gefellet Gott wol / Aber es ist kunst vnd gnade.

Wisset ihr auch / das das sechste gebot heisst / Du solt nicht ehebrechen / Das gebot (wie die andern alle) macht kein vnterscheid der person / sie seien geistlich odder weltlich / Pfaffen odder Leyen / so sollen sie nicht ehebrechen / das ist / eins andern frawen nicht berüren / Weil es aber ieder
man

man eins andern frawen verbent/ So ist gewis/ das es iez
derman eigen frawen zu leßt/ Ja auff das niemand eins
andern frawe berüre/ zwingts ihn zu einer eigen. Wenns
nu war were (wie die lieben Canones leßern) das ein Pfar
her/ nicht künde Gott dienen/ neben einer eigen frawen/
so müste dis sechste gebot schlecht auff gehalten sein/ vnd ni
cht inn gemein allerley person treffen vnd eigen frawen er
leuben.

Dem also möcht ich fort von andern geboten auch sa
gen/ Du must kein eigen gelt noch gut haben/ sonst kanstu
Gott nicht dienen/ so doch das siebend gebot/ Du solt ni
cht stelen/ eigen gelt vnd gut zu leßt/ allein frembd gut ver
bent/ Ja auff das man nicht stele/ gebents eigen gut zu ha
ben. So weis ich auch noch nicht/ ob grösser fahr sey der
sunden bey eigenē gelt oder bey eigenem weibe Geitz/ Mam
mon vnd die gesellen/ sind warlich mechtig. Aber summa/
Es ist eine grosse büberey des Canons/ das er fur gibt/
Man könne Gott nicht dienen bey einer eigen frawen/ vnd
können doch wol Gott dienen/ bey eigenem Mammon/ gelt/
gut/ schlössern vnd stedten/ Das widder spiel ist war/ das
besser sey bey eigener frawen Got dienen/ denn bey eigenem
gut (wie wol keines einen Christen hindert) Den ein weib/
das hat man doch/ vnd ist die sorge aus/ wie mans kriegen/
vnd sie kan sich selbs bewaren/ Aber gelts kan man nimer
gnug kriegen/ vñ sorget imer fort/ on auffhören/ wie mans
mehr vnd behalte/ Solche sorge aber vnd liebe/ das sind
die rechten hindernis an Gottes dienst/ welche sorge/ wol
ein weib/ dem Pfarher entnemen kan/ das sie sorget/ vnd
leßt ihn schlechts Gott dienen.

Item/ So solt auch einer wol narren widder das fün
fft gebot/ vnd sagen/ Du kanst nicht woffen/ büchsen vnd
ander wehre haben/ vnd daneben Gott dienen/ Denn du
möchtest tod schlafen/ schaden thun/ odder damit gehin
dert werden/ So doch das fünfft gebot allein verbent/ das
man nicht tödten solle/ Erleubt aber gleichwol/ woffen vñ
L iij wehre/

wehre / Ja auff das dem morden gestenret werde / gebents
woffen vnd were zu haben . Warumb haben aber vnser
Ehelosen heiligen leute / beide eigen gelt vnd woffen / baw
en vnd streiten getrost / hindert sie das nicht an Gottes dis
enst / Nein / sondern ein ehewolun mus sie hindern / Es ist
ein Hans worst gewest / der solchen Canonem gemacht
hat / Ein Hans worst den andern / noch hat er alle welt /
auch alle hochgelerten verblindet.

Der teuffel aber hat das mit diesem Canone an rich
ten wollen / das seine Ehelosen keine eigen frawen / sondern
an der selbigen stat / aller andern frawen / töchter / megde /
dazu auch Sodomam / hetten / welchs sie inn der ehe nicht
hetten gethan. Also auch an stat eigens guts (denn es saur
wird zu erwerben) aller welt güter zu verschlingen vnd
mit müßig gang verbrassen / Welchs auch wol nach bliebe /
wo sie solten eigen gut suchen vnd erwerben. Also haben sie
woffen verboten / das sie aller Könige schwerd möchten
regen / vnd damit machen / was sie wolten / welchs auch wol
nach bliebe / wo sie ihr eigens allein haben müßten / Aber
wunder vber wunder ist / das solch drey stücke / nemlich / al
lerley freye vnzucht / allerley geiz vnd pracht / allerley wof
fen vnd krieg / diese Ehelosen heiligen nicht hindern Gotte
zu dienen / Vnd ein einiges fromes Eheweiß hindert sie.

Vnd wenn alle ding ia feylen würde / das Bapst / Bis
schou / Tumherrn vnd das volck / ia wolten im ehelosen od
der hurn vnd buben stande bleiben / Sintemal auch der
heidnische Poet bekennet / das buler vnd hurn treiber / vn
gern ehewrauen nemen / So hoffe ich doch / ihr werdet euch
vber die armen Pfarher vnd seelsorger erbarmen / vnd den
selbigen die ehe lassen / vnd nicht mehr solche schendliche /
mördische / tolle Canonisten odder Juristen sein / wie ihr bis
her gewest seid / Denn ewr Canones / setzen / das man einen
Ehepaffen solle suspendiren / das ist / vom ampt setzen / so
habt ihrs mit ewren groben Eselen vnd Bachanten / also
gedenket / man solle sie hengen / ertrencken / erstechen / er
morden

morden vnd vertragen/ So gar bluthürstig/ vnd mörderisch
seid ihr bluthunde / das ihr widder vnd vber ewr eigen
recht euch nicht schemet zu wüten nach allem mutwillen.
Werdet ihr euch nicht erbarmen/ als ich Sorge/ Es lüge euch
auff dem halse/ vnd drücke euch so viel vnschuldigs bluts/
so viel gewölicher laster vnd vngehewrer bosheit/ das euch
Gott schwerlich gnade geben wird/ etwas anders zu thun/
on allein solchs / damit ihr ia bald ewer verderben vber
euch reizt (wie Sanct Petrus spricht. 2. Petri. 2.) Wolan/
so wird man dennoch thun/ was Gott wil/ vnd nicht was
euch gefellet.

Für die Münche weis ich nicht zu bitten/ Denn man
weis wol/ ihr woltet lieber / das sie alle sampt für den teuf
ffel weren / Gott gebe / sie nemen weiber odder nicht /
Vnd nicht vnbillich/ Denn zween hane auff einer misten
leiden sich nicht/ Sie wollen das leben haben/ das ihr ha
bt/ vnd gern allein hettet/ das ist euch nicht zu leiden/ Dar
umb lasst sie faren die schelmen/ Sie sollen nicht Bisschoff
lich noch Thümisch leben führen/ Es gebürt allein zu der Kir
chen vnd den Gottes dienern/ wie ihr seid. Gott der alme
chtige wolte ia gnediglich / mehr vnd bessers thun / denn
ihr gedencet/ vnd wir vns zu euch versehen/ Amen/ Sonst
wird der teuffel (sorge ich) Abt / vnd seine mutter Ebtissin
werden/ On das dis meine hoffnung vnd trost ist/ weil ihr
nicht ewig hie leben künd/ vnd man doch mus imer newe
Pfarher vnd seelsorger auff zihen / So werden (ob Gott
wil) die iungen gesellen/ die hernach dringen/ sich nicht las
sen mit ewren tollen lesterlichen eiden vnd pflichten zum
ehrlosen stande vnd andern geweln verknüpfen. Wer
den aber darüber die Pfarhen wüß / vnd das volck on
wort bleiben / vnd die Münche vergangen/ so solt ihr se
hen / wie lange Bisschoue vnd Tumberrn / stift vnd klö
ster bleiben sollen/ Es müssen ia Pfarher sein/ wenn schon
nimer kein Bisschoff/ noch Tumberr/ noch Münche weren.
Es ist die Christenheit bis her/ so viel hundert iar on
solche

solche Stifft Bisschou vnd Tumberrn erhalten/ sie han
auch noch wol hinsürt / on die selbigen erhalten werden.
Es wird ia freilich am Jüngsten gericht/ keine Christen see
le sich rhümen odder zeugen können/ das inn so viel hundert
iaren/ ihe eine von ihrem Stifft Bisschoue hette das
Vater vnser/ Zehen gebot/ glauben/ odder ein Euangelion
gehört odder gelernt/ odder eins einigen Bisschofflichen
ampts odder wercks empfunden odder genossen. Wir ha
ben ia bisher/ vor dem Luther/ selbs gelebt/ als hetten wir
gar keine Bisschoue/ müssen auch noch so leben/ So weis ich
fur war/ das alle welt sagen mus/ das sie vor des Luthers
lere/ nicht mehr von ihren Bisschouen gehabt/ denn izunt/
vñ izunt nicht weniger denn zuuor/ ausgenommen die schin
dery vnd gelt schezung. Sie können nicht fülen noch mer
cken/ ob sie vor hin Bisschoue gehabt/ odder izt keine ha
ben/ So gar ist ihn nichts ab noch zu gangen Bisschofflich
er werck vnd ampt/ Das heist vleissig der seelen gewartet/
So suchen sie izt widderümb zuwarten.

Ja (sprechen sie) Wir weihen vnd ordenen andere
an vnser stat/ die solchs thun/ Das thun sie auch nicht/ son
dern der Wey bisschoff thuts / der selbige helt auch keine
Bisschoffliche weise noch art/ denn er weihet allein zur opf
fer Messen/ fragt kein bitten darnach / wie vnd was man
predigen solle/ vnd was den leuten not ist zu lernen / Dar
umb ist er auch zu frieden/ wen die Pfaffen kaum ein Requi
em lesen können/ schmirrt darnach flugs den vngelernten es
len seinen Chresem an/ vnd lest sie hin streichen. Gott selbs
schafft Prediger/ wo sie sind/ vnd erhelet dadurch seine Kir
chen/ der Stifft Bisschoue vnd Wey bisschoue halben/ we
re sie lengest hundert tausent mal zurgangen. Wie wol/
das sie bisher so vbel gestanden vnd noch stehet / wes ifs
schuld / anders/ denn der Stifft bisschoue/ die inn der Apo
stel stat vnd inn Bisschofflichem ampt sitzen/ vnd thun der
selben keines/ lassens alles zu boden gehen / Vnd schreien
izt gleichwol/ man solle sie zu vorigem regiment komen las
sen/ sie

sen/sie suchen der seelen heil. Es ist sonst ein fein regiment
gewest/vnd suchen wol der seelen heil. Ja den Teuffel auff
ihren kopff (der sie auch reitet) vnd vnser aller vnglück
auff vnsern hals/wie vns vorhin auch widerfahren ist. Es
ist vmb's Fürstlich Meum vnd Tuum zu thun / Bisschoffs
lich ampt/wil wol bey den Pfarherrn vnd Predigern blei
ben.

Weiter (geben sie für) Wir lassen aber leute studiren
inn hohen schulen/ die zu predigen tüchtig / vnd darnach
aus vnserm befehl durch den Wey bisschoff geweiht wer
den. Das ist war/ ihr last sie leider studiren. Das thut der
Türk vnd die Jüden auch/lassen studirn/Was geben od
der helffen sie dazu? Ihr auch / was gebt vnd helfft
ihr dazu/aus ewren Stiffelichen Mammon/das irgent ei
ner studire/wie ihr doch hoch schuldig seid? Ja wol/ Es ist
euch leid das hohe schulen sind. Sondern da stinckt euch
der odem nach/ Der Münche seid ihr nu los/ odder ihe me
chtig/das nemet ihr vom Euangelio frölich an/ Der Theo
logen vnd Gelerten weret ihr auch gerne los/die ligen euch
noch im wege/ Weren die weg / wolan / so weret ihr der
Pfarherrn vol mechtige herrn / darnach künd ihr widder
uber Könige vnd Fürsten steigen / Ja auch den Papst
selbs/als der ewer nicht geraten künd / zwingen / das wir
Bisschone allein Götter vnd Herrn auff erden weren / Da
wolt ihr hinaus/lieben Herrn/ Jhs nicht war / der heimli
che ratschlag zu Metz/da ich nicht bey sein künd / der sel
bige leise tritt gieng auff dieser ban? So hetten wir denn
die welt vol Esel vnd die Kirchen gar kein wort noch Pfar
ampt mehr. Ach soltet ihr studiren lassen / So doch die
pfreunden /die auff den stiffen den hohen schulen einges
leibt sind/niemand werden/er habe denn zuuor/durch ans
der leute hülff gestudiret/ Vnd wenn sie ihm werden sollen/
mus er sie zuuor mit einer summa küssen vnd bezalen / Vñ
wenn er sie nu bezalet hat/wird er verbunden im Stiff zu
heulen vnd zu plappern/auff das ia sein studirn vñ kunst/
S nicht

nicht zum predig ampt odder lere ampt gedeye / So helffe
ihr der Christenheit.

Ich setze aber / das ihr andere an ewr stat verordenet
(als ihr doch nicht thut) die predigen vnd Bisschoue sein
sollen von ewren wegen / So höret ihr ia wol / Ich rede izt
von Bisschouen / vnd rede nicht von bestellern / Ein Bawr
odder Richter im dorffe / Eine Stad / ein Fürst / kan auch ei
nen Prediger bestellen / Ist drumb kein Bisschoff. Ein Biss
choff heisse / der selbs weiden sol Gottes volck. Denn da ste
het / Act. xx. Sanct Paulus lere / zu den Bisschouen. Habt
acht auff euch selbs vnd auff die gantzen herd / vnter wel
che euch der heilige geist gesetzt hat zu Bisschouen / zu wei
den die Gemeine Gottes / welche er durch sein eigen blut er
worben hat. Weret ihr Bisschoue / wie ewer namen vnd
ampt foddert / so wurden euch die hargen berge stehen / für
diesem spruch / Vnd wurdet wol so vngern Stiffst bisschos
ne sein / als ich Prediger vnd Doctor bin / Sintemal ihr wür
dets nicht viel besser haben / denn ich vnd meins gleichen /
So spricht auch S. Paulus / Ein Bisschoff sol Didacticus
sein. 1. Timo. 3. Tit. 3. das ist / leerhafftig / der imer anhalte
mit leren / Er meinet aber nicht Fürsten bisschoue / noch
Schlos bisschoue / sondern Kirchen bisschoue / die das wer
ck treiben / wie (Gott lob) izt viel feiner Pfarher thun / ob sie
wol nicht spize hute tragen / welche können die blöße vnd
Nielasbisschoue auch tragen. Denn das ihr / als Bisscho
ne / solt auffsehen / was recht gelert sey / vnd wisset es selber
nicht / das ist lecherlich / ia leider nicht lecherlich / denn wir
bisher wol erfahren / was ewr auffsehen / guts geschafft / wie
obgemelte stücke zeigen.

Dis alles hab ich / lieben Herrn / euch müssen erinnert
vnd vermanen / vmb des willen / das ich sehe / wie ihr Gott
nicht fürchtet / vnd für ewr gewolich verkeretes wesen / keine
reue noch busse sucht / auch kein gewissen drüber macht /
damit denn Gott auffs aller höchest erzürnet wird / Denn
sintemal wir arme Lutherischen / ehewiber genomen / lasse
ihr

Ihr euch düncken/ ihr habt ein mal ein stücklin an vns ergriffen/ weil ihr sonst nichts finden kündet/ das ihr euch nütze machen wollet/ vnd vns damit so schmutzen vnd drücken/ das damit/ alle ewer schendliches vnzüchtiges hurn leben/ alle klöster raub vnd stift dieberey/ sampt aller grundsuppe/ ewer gewel vnd verkereter/ vnbißhofflicher misbrauch/ schand/ laster/ schaden vnd verderben der Christenheit/ solle verborgen/ bedeckt/ geschwigen/ schön vnd gelobt werden/ das ihr hinfurt/ als die reinen vnd vnschuldigen/ die nie kein wasser betrübet/ gleich vber die Apostel selbs/ euch aller gewalt vnterwinden müget. Aber faret schon/ liebet herren/ sehet/ das euch nicht feyle/ spricht nicht/ Zui/ ihr seid noch nicht vber den berg. Wie ihr euch decken vnd schmücken künd/ das habt ihr nu gesehen/ Ihr habt aber noch nicht gesehen/ wie man euch den schönen balck abstreiffen kan/ Vnd euch daher malen/ das ihr euch selbs müßet anspeyen/ Pocht vnd trogt nur nicht/ Ewr sache ist nicht so gut/ als ihr meinet.

Künd ihr vns vnser chefrawen auffrücken/ die wir doch für Gott mit gutem gewissen/ vnd für der welt/ nicht als vnser huren/ sondern als vnser chefrawen/ bekennen/ So glaubt ihr nimer mehr/ wie meisterlich/ wir euch wollen auspuzen/ ewer hürlein/ vnd geraubten eheweiber/ die ihr vnd wir wissen/ das ihr sie mit keinem guten gewissen habt/ das zu für der welt nicht anders/ denn als ewr huren bekennen vnd euch als die huren treiber vnd huren wirte/ beide für Gott vnd der welt/ nennen vnd vrteilen lassen müßet. Zudem/ wollen wir euch ewer Römische Sodoma/ Wellische hochzeit/ Venedische vnd Türckische breute vnd Florenzische breutgam/ also austreichen/ das ihr sehen solt vnd greiffen/ das sich vnser Ehe an ewer ehrosen keuscheit redlich gerochen habe. Vnd ob villeicht ewer elliche nicht inn allen solchen schuldig sind/ Da fragen wir nicht nach. Es sol schutz herr/ verteidinger/ gesell vnd genossen/ gleich so viel als die selb schuldigen gelten/ dar

Sij umb

umb/das sie solche laster nicht straffen / bannen / meiden
(wie das Euangelion/vnd ewr eigen recht leret) Sondern
solchen vbelthetern helfen/beistehen/vnd widder vns ne-
ben ihn wüten/vnd sich mit solchem beistand / aller solcher
grewel teilhafftig machen/vnd damit nichts bessers sind/
denn die selbschuldigen / Roma.2.

Denn es hat nie kein Zeide / nie kein Türck / nie kein
Papst/nie kein Keiser/vnd nie kein mensch auff erden / ge-
setzt odder gethan/das man iemand umb der Ehe willen
hette getödtet/Vnd ist ein new vnerhöret ding / von euch
newen Bisschouen angefangen/ die ihr seid die grossersten
Stift reuber/huren wirtze vnd huren ieger. inn ewren Sti-
fften/so auff erden sind. Vnd thuts auch nicht umb keusch-
eit willen zu erhalten/Sondern darumb/das man nicht
wil hürerey vnd vnzucht treiben/wie ihr thut/denn die sel-
bigen last ihr vngestraft/Vnd kan niemand glauben/ das
ihr die keuscheit mit solcher straffe trewlich meinet / Sintes-
mal grösser feinde der keuscheit nirgent sind / den ihr seid/
als die ihr sie/inn ewrem eigen leibe/ mit aller vnzucht / on
vnterlas auffs aller schendlichst verfolget.

Wie wol solchs stück das geringst ist / gegen dem ho-
hen gemeinen greuel/ das ihr solche Bisschoue seid / wie
droben angezeigt/vnd mit der zeit(wo ihr euch nicht bes-
sert)anders sol ausgemugt werden/Den sollen wir ia Got-
lose huren treiber/vnd Gottes feinde zu Bisschouen ha-
ben/so wollen wir ihn auch gar redlich weisen / inn welche
Kirchen sie gehören/das solt ihr gewislich erfahren / Denn
so lange ihr vnser Ehe nicht zu frieden last/solt ihr auch ni-
cht viel freude vnd ehre/von ewer hürerey / vnd Endchri-
stlicher Bisschofferey haben/Sterbe ich drüber/so sind an-
der da/die es besser können. In summa/wir vnd ihr wiss-
sen/das ihr on Gottes wort lebt/wir aber Gottes wort ha-
ben/Darumb ist vnser hochste beger/vnd demütigste bit/
ihr wollet Gott die ehre geben/euch erkennen / büssen vnd
bessern/wo nicht/so nemet mich hin/Lebe ich / so bin ich
ewr

ewer pestilenz/Sterbe ich/so bin ich ewer tod / Denn Gott
hat mich an euch gehezt/ich mus (wie Hosea sagt) euch ein
Beer vnd Lowe sein im wege Assur/Ihr solt doch für meis
nem namen keine ruge haben/bis das ihr euch bessert / od
der zu grund gehet.

Darumb bieten wir euch an die wahl. Erstlich/weil ihr
doch Bisschöffliche ampt vnd werck nicht kund noch wol
let verhegen/als die ihr zu predigen vnd gewissen zu trö
sten vnd richten /doch warlich/warlich nicht tüget / sampt
alle ewren gelerten/So last vns doch ewr ampt / das ihr
schuldig seid/aus richten/ Gebt vns das Euangelion frey
zu leren/vnd last vns dem armen volck (das frum zu sein
begert)dienen/Verfolget vnd weret doch dem nicht / das
ihr nicht kund/vnd doch schuldig seid/vnd andere für euch
thun wollen.

Zum andern/so wollen wir vber das/nichts von euch
begeren/noch sold von euch nemen/sondern wo vns sonst
Gott erneeret/gewarten/auff das ihr also/beide der erbeit
vnd lohn der mühe vnd kost/vber haben seid. Nicht das
wir so grosse lust hetten zu predigen/Denn für mich zu re
den/wolt ich kein lieber botschafft hören/denn die/so mich
vß predigt ampt absetzt/Ich bins wol so müde/der grossen
vnd anckbarkeit halben im volck/aber viel mehr der vntreg
lichen beschwerung halben/so mir der Teuffel vnd die welt
zu messen. Aber die armen seelen wollen nicht/So ist auch
ein man/der heisset Ihesus Christus/der spricht nein dazu/
dem folge ich billich/ als der wol mehr vmb mich verdie
net hat. So wisset ihr (Gott lob)nu selbs alle/das die Lu
therischen Prediger frum sind/vnd thun euch nicht scha
den/Sondern sind euch nützer/denn alle ewr vnd des Pap
sts gelerten. Vnd frümer kezer habt ihr nie gehabt/werdet
sie auch nicht frümer kriegen/bittet Gott/das sie euch nüt
gen bleiben.

Zum dritten/wollen wir euch lassen bleiben was ihr
seid/vnd leren (wie wir denn bis her gethan) das man euch

Sij solle/

solle/ Fürsten vnd Herren sein/ vmb friedes willen/ vnd ewer
er güter lassen/ Welchs doch die Hussiten vnd Diglephis
sten nicht gethan/ auch noch izt kein schwermer noch rot
ten geister thun wollen/ Damit ihr doch sehet/ das ihr nicht
feinde/ sondern grosse freunde/ ia auch schutz herrn an vns
habt/ Denn was schadet vns das/ ob ihr Herrn vnd Für
sten seid? Wolt ihr nicht für euch vnd ewren stand vnd am
pt thun/ was recht ist/ Wolan/ da werden nicht wir/ son
dern ihr rechen schafft vmb geben/ Allein halt doch friede/
vnd verfolget vns nicht. Wir bitten ia nicht mehr/ haben
auch nie anders gebeten/ denn vmb frey Euangelion/ Ihr
Künd vns/ vñ wir euch/ zum frieden helfen. Thut ihrs nicht/
so behalten wir die ehre/ vñ verlieret ihr/ beide fried vñ ehre.

Zum vierden/ Künd ihr den Bisschofflichen zwang
widder anrichten (so ferne ihr vns das Euangelion frey
lasset) da wil ich für mein teil/ auch getrost zu helfen vnd
raten/ auff das ihr doch etwas Bisschofflichen ampts auch
haben müget. Vnd also hettet ihr denn zwey stück Bisscho
ffliches ampts/ Eines/ das wir vnd die Prediger/ an ewer
stat/ das Euangelion lereten. Das ander/ das ihr hülffet
solches handhaben mit Bisschofflichem zwang. Ewer per
son leben vnd Fürstlich wesen/ liessen wir ewrem gewissen
vnd Gottes vrteil/ So haben wir auch bis her euch solchen
zwang nie genomen/ ihr habt ihn selbs lassen fallen. Den
da ihr das Ablas vnd ander vnleidliche misbreuche/ damit
nicht erhalten kundtet/ liesset ihrs ganz vnd gar fallen/ vnd
woltet vnser Euangelion nicht schützen/ dazu auch nicht lei
den/ Sondern keretet solchen zwang widder vns vnd wid
der das Euangelion/ Da must er wol sich stossen vnd stum
pff werden/ Denn Gott hat ihn nicht geordnet widder sein
wort/ sondern für sein wort.

Mehr vnd höher können wir vns warlich nicht er bieten
(ober das teglich gebet/ guten willen vnd dienst/ die wir on
das/ auch allen feinden schuldig sind) nemlich/ Ewer ampt
wollen wir auerichten/ Selbst wollen wir vns/ on ewr kost/
neeren/ Euch wollen wir helfen bleiben/ wie ihr seid/ Dazu

ratent/das ihr vberhand habt vnd drein sehet/das recht zu
gehe. Was sollen wir doch mehr thun? Warlich wir tragen
schweer/haben euch vnd die rotten geister vnd alle welt/ia
alle teuffel auff vns geladen/vnd vns hilfft niemand. Wer
det ihr nu nicht wollen auch helffen/sondern iner fort drüs
cken/So sehet zu/das ihr vns den rücken nicht entzwey bre
chet/vnd die gedult zu hoch versuchet. Werdet ihr die frum
men Kezer dempffen wollen/die euch tragen/so sehet zu/wo
ihr bleibet. Es ist vns leid er das spiel nicht mehr inn der
hand/wie bis her gewesen/der teuffel hats vns entwand/
Wir könnē warlich euch nimer helffen/helffe euch nu auch
selbst/vñ sehet nicht euch/sonder den gemeinen hauffen vñ
den lieben friede an. Es ist hohe zeit/Wir wollen auch vñ
ser bestes thun. Vñ ist irgent ein frum hertz vnter euch/das
kan doch ia wol aus dieser ganzen schrifft mercken/das ich
die warheit sage vnd sagen mus/vnd von hertzentrewlich
mit euch vnd iederman meine. Mehr kan ich ia nicht / Denn
ihr habet doch ia zu trefflich böse sachen.

Ob iemand hie dencken würde/ Es sey lecherlich zu
hören/das die stiftt bisschoue/die Kirchen regieren sollen/
Weil man wol weis/das sie es nicht können noch lernen/
So doch Sanct Paulus spricht / Wer seinem eigen hause
vbel für stehet/der wird der Kirchen nimer mehr wol für ste
hen/Vnd man für augen sibet/wie die Bisschoue ihren stift
ten für stehen vnd zucht halten/nemlich/das impunita Lu
panaria vñ Latrocinia sind. Antwort: Ich weis leider wol
das so ist/Aber auff das die heilosen leute sehen / das wir
friede suchen/vnd an vns nicht mangelt/Kan ichs wol lei
den/das sie Pfarren vnd Predigstül mit geistlichen perso
nen versorgen/vnd also das Euangelion helffen handha
ben/Mir ist lieber der mangel sey an ihn / denn an vns /
Vnd Gott hat wol ehe durch böse buben regiert vnd
guts gethan / Vnd mus dencken / es sey izt die zeit / da
Herodes zu Jerusalem / das Priesterlich ampt verkaufft/
Die Römer auch / Vnd bleib dennoch Gottes dienst
vnd

vnd wort. Wollen sie aber das Euangelion dempffen / oder so gar vnbusfertig bleiben / des mügen sie ihr ebentheur stehen / Wir predigen doch / was wir wollen. Auch sitzen sie so feste nicht / haben sie lust zu vnglück / so hat Gott bald einen andern Münzer erweckt / der sie vollend störzte. Wollen sie nicht Bisschoue sein inn Gottes namen / so seien sie ins teuffels namen Bader / on' das wir nicht schuld noch vrsachen dazu sein. Die Lutherischen bleiben wol Meister / weil Christus bey ihm / vnd sie bey ihm bleiben / Wenn gleich helle / wellt / Teuffel / Fürsten vnd alles solt vnfinnig werden.

Es wil aber izt zu viel vnd zu lang werden / mehr stücke zu handeln / Gott helffe euch auff dem Reichstage / also faren / das vns nicht not sey alles von newen widder an zu fahen / denn das ist euch nicht gut / so sind wir der mühe lieber vber haben. Doch das ihr nicht dencket / Es seien lose drew wort / das ich izt sage / wil ich hie / so viel mir izt einfellet / stücke vnd artikel erzelen / so auff beider seit getrieben werden.

Die stücke / so notig sind inn der rechten Christlichen Kirchen zu handeln / da wir mit vmb gehen.

| | |
|-------------------------------|--------------------|
| Was Gesetz sey. | was die Liebe. |
| Was Euangelion. | was das Creutz. |
| Was Sünde. | was die Hoffnung. |
| Was Gnade. | was die Tauffe. |
| Was Geists gabe. | was die Messe. |
| Was die rechte Busse. | was die Kirche. |
| Wie man recht beichtet. | was die Schlüssel. |
| Was der glaube. | was ein Bisschoff. |
| Was vergebung der sünden. | was ein Diaconus. |
| Was die Christliche freiheit. | Was das Predigamt. |
| Was der freye wille. | |

Der recht

Der rechte Catechismus

Zehen gebot.
als Vater vnser.
Glauben.

Das rechte gebet.

Die Litania.

Lesen vnd auslegung der
Schrift.

Was gute werck sind.

Vntericht des Ehestands.

Solche stücke hat nie kein Bisschoff gehandelt / vnd
sind dazu von den ewren auch nie grundlich verstanden
noch geleret / vnd ein gros teil gar verblichen / Das dürfft
ihr nicht leugnen / Wir sind inn ewren schulen auffgezogen /
So sind ewer bücher noch vorhanden / die solchs zeugen /
So zeugt alle welt / das zuor nie ist gepredigt. Tu istis
gewis / das an diesen stücken gelegen / vnd die Christliche
Kirche / mit diesen versorgt ist / vnd darff ewer vnnötigen
zu setze nichts vberal.

Hie bey wil ich nicht erzelen / die Denschen lieder /
Braut segen vnd viel guter heilsamer büchlin / Aber wie
viel gewel / wir damit nidder gelegt vnd bey vns ausge-
rott / wil ich izt auch nicht erzelen / Ist gnug angezeigt / wie
viel stücken wir noch zu reden hetten / wo wir zeit vnd raum
nemen wolten.

Die stücke / so inn der gleissenden

Kirchen inn vbung vnd brauch sind gewest.

- | | | | |
|---|---|----|---|
| 1 | Ablas. | 7 | Vigilien. |
| 2 | Opffer Messen vnd die sel- bigen vnzelicher weise. | 8 | Seel Messen. |
| 3 | Bann im misbrauch gar. | 9 | Jargezeit. |
| 4 | Segneur. | 10 | Vier wochen. |
| 5 | Poltergeister. | 11 | Seel bad. |
| 6 | Walfarten vnzelich. | 12 | Heiligen dienst / der et- liche nie geboren. |
- G Heiligen

Kinder

Der Knecht.

Megde.

Die Oberkeit zu ehren

Kinder schulen.

Krancken besuchen.

Armen vnd hospital versor-
gen.

Die sterbenden berichten.

- | | | | |
|----|---|----|--|
| 13 | Heiligen feyr / dt maffe / | 35 | Subdiacon / wey |
| 14 | Maria eine gemeine Abgottin gemacht mit vnzelichen dienst / feyr fasten / gesenge / Antiphonen. | | hen zu keinem ampt / allen zur freyheit. |
| 15 | Butter brise. | 36 | Brigitten gebet. |
| 16 | Heiligthum vnzelich / mit lügen. | 37 | Vnd der gleichen onzal / vnd allerley betbücher voll mit lesterlichen / schendlichen Gottes vnchren. |
| 17 | Brüderschafft vnzelich. | | Platten. |
| 18 | Ehelos leben. | | Capeln. |
| 19 | Kirchen weyhen / | | Alben. |
| 20 | Altar weyhen / | | Korbembd. |
| 21 | Bilder weyhen / mit Ablass. | | Kappen. |
| 22 | Glocken teuffen / mit 200 gefattern an einem strick. | | Kirchen. |
| 23 | Vnterscheid der speise / | | Capellen. |
| 24 | Vnterscheid der tage / | | Altaria. |
| 25 | Vnterscheid der kleider / als notig. | | Altartucher. |
| 26 | Gezwingen siebenzeit ob der hore Canonice. | | Lichter. |
| 27 | Sontags procession ein schawspiel. | | Leuchter. |
| 28 | Die letzte slung zum tod / nicht zur gesundheit. | | Bilder. |
| 29 | Sacrament der Ehe / | | Tafeln. |
| 30 | Sacrament der Priesterschaft. | | Crucifix. |
| 31 | Sacrament der fermung | | Kerzen. |
| 32 | Acoliten / | | Fanen. |
| 33 | Consuristen / | | Reuchfas. |
| 34 | Lectores / | | Tauffstein. |
| | | | Monstrantz. |
| | | | Ciborium. |
| | | | Kelch. |
| | | | Orgeln. |
| | | | Glocken. |
| | | | Weyhwasser. |
| | | | Weyhsaltz. |

Vnd des ables vber die nordurfft / allein als ein sonderlichen Gottes dienst widder den glauben.

Würg!

Wirtz hochzeit

Vnd allerley speise

Inn der Fasten.

Ascher miwoch.
 Junger tuch.
 Bilde verhullen.
 Fasten halten/ausgenommen die
 Pfaffen.
 Litania der heiligen.
 Marien gesang das abends.
 Beicht marter.
 Buss vnd gnugthun.
 Lange preces.
 Palmen Esel.
 Palmen schiessert.
 Palmen schlucken/
 Palmen Creuzlin.
 Zwingen zur Beicht.
 Zwingen zum Sacrament
 Creuz kussen vnd anbeten.
 Creuz begraben.
 Halbe Messe am stillen Frey-
 tag.
 Beim grabe Psalter singen.
 Finster Netten.
 Licht leuten/aber klappern.
 Passio predigen acht stun-
 de.
 Feur weyheit.
 Oster kertzten
 Creutz aus dem grabe heben/
 vnd spielen tragen.

Gladen weygen/ans O-
 ster tage
 S. Marx procession.
 Creutz woche. bedes gut
zu aller vn-
sucht.
 Himmelfart zur Toner.
 Heiligen geist am Pfing-
 stag.
 Processio corporis Chris-
 sti.
 Assumptio beate virgi-
 nis.
 Kirch weyh.
 Patron fest.
 Gemeind wochen.
 S. Burkars fest.
 Quater temper.
 Aller heiligen fest.
 Aller seelen tag.
 S. Martens gans.
 Aduen/dmer Marie dem
 Christo zu dienst.
 Korate Messe.
 Conceptio beate virginis
 Drey Christ messe.
 Apparuit vnd spiel
 Hafern S. Stephan.
 Johans trunck.
 Licht Messe vnd wachs
 S. Agatha licht. (marck)
 S. Blasius licht.

Ich wil hie auff hören/Denn wer vermag es alles zu
erzelen inn solcher kürze? Wil man aber nicht friede ha-
ben/so Kaychs (odder ein ander besser) noch wol weiter
zelen/auff das die lieben Tumbherrn vnd Bischouc nicht
dencken/die Mönche haben allein gesündiget/vnd sie sei-
en das reine Betzlin. Nicht also / Ich hab auff dis mal/
nicht mehr wollen anzeigen/denn was allein inn den Pfar-
Kirchen ist im brauch gewesen/Welche doch/das geringste
stück inn ewrem regiment/vnd vber alle masse veracht ge-
west sind/welche ihr auch mit füßen getreten habt. Sole-
ich aber inn den stüffkirchen/Thumbkirchen/Ossicial heu-
ser/Blöster vnd Predigstül/komen/Vnd darnach auff die
bettel Mönch/ Stacionierer/zuletzt vnter die Sophisten
inn den hohen schulen/Hilff Gott/mich wundert nichts/
das ihr solch grundlose greuel vergeffet/vnd euch nu sucht
zu schmücken/Hab ichs doch selbs (bey dem lieben Gott)
vergesen/vnd nicht gemeinet/das ihr da sesset/da ich euch
itzt sehe sitzen. Vn schweiget/vmb Gottes willen/vn bes-
fert euch/Es wird sonst böse mit euch werden.

Wol ist's war/das vnter obgezelten stücken etliche
sind/die nicht zu verwerffen sind/Vnd der selbigen etliche
sind gefallen/die ich nicht wolt/das sie gefallen weren/kön-
nen aber wol leichtlich widder auff komen. Vnd ist darinn
das aller best/das feine Latinische gesang/de tempore/da
sind blieben/wie wol sie dennoch von den newen Heiligen
gesungen fast vbertenbet/vnd auch schier nichts gelten/
Doch behalten wir sie fest/vnd gefallen vns von her-
zen wol. Vnd das ich kurtz meine meinung sage/So ist
das die Summa davon.

Wenn man solche stücke hette lassen bleiben/ein kind
derspiel für die iugent vnd iunge schüler/damit sie hetten
ein kindlich bilde gehabt/Christlicher lere vnd lebets/wie
man doch mus kindern/tocken/puppen/pferde/vnd ander
kinder werck für geben/Vnd were bey dem brauch blieben/
wie man die kinder leret Sanct Nicolas vnd dem Christ
kind

Sind fasten/das sie ihit sollen des nachts bescheren / wie
sichs lest ansehen / das vnser vorsehen haben gemeinet /
So were es wol zu leiden/das man Palm esel / zimelsart /
vnd der gleichen viel liesse gehen vnd geschehen / denn da
were kein gewissen mit verwirret .

Aber das wir alte narren / inn Bisschoffs hüten vnd
geistlichem geprenge daher gehē / vnd machen ernst drans
Ja nicht allein ernst / sondern artikel des glaubens / das es
sünde mus sein / vnd die gewissen martern / wer solch kinder
spiel nicht anbetet / das ist der teuffel selbs / Darans folget
denn / das alle obgenante stücke / wie kindisch vnd lecher
lich sie sind / dennoch mit ernst / den Christlichen glauben /
vnd die rechten nötigen stück / so ob angezeigt / stürmen vnd
verderbē / als were sonst kein hülffe / man hette denn solchs
gehalten / Denn wir leider wol erfahren bis her / das man
solch kinder vnd narren spiel / hat mehr vnd ernstlicher ge
trieben (vnd noch) denn eben die rechten heubtstück . So
sind wir nu der meinung / Können wir solch kinderspiel / die
leidlich sind / helfen erhalten / vmb der iugent willen / on
nachteil / der rechten ernstern heubt stück / so wollen wirs ger
ne thun . Aber / das wir sie fur artikel des glaubens sol
ten halten / vnd auch inn Bisschoffs hüten / Narrare / da
wird nicht aus / zorn vnd lache wer da wil .

Dis wil ich auff die mal / euch lieben Herren / zur fre
vndlichen vnd trewen vermanung angezeigt haben / mit
allerhöchstem vleis bittend / ihr woltet sampt vns / Gott
ernstlich anrufen / das er euch gnade vnd weisheit verleih
he / inn diesen grossen sachen / thun vnd handeln / das sein
ehre vnd vnser aller heil sey / Vnd wollet ia da für sein / das
ihr euch nicht schmucket / noch ewer vorige mishandlung
entschuldigt / verteydingt / odder mit gewalt faret / Denn
was hilffts / das ihr noch mehr böse blue im volck macht
Die hertzen sind bereit / vnd nicht on redliche vrsachen / als
zu hoch erbittert / das wol not thut / mit demütigem bekent
nis vnd statlicher besserung / die selbigen zu lindern / senff

ten vnd stillen/vnd nicht weiter zerren vnd reißen. Denn
ihr wisset (wenn schon kein Euangelion were) das ewer
wesen vnd stand/auch widder ewer eigen Rechte /aus der
massen vnd zu viel/ gefallen vnd verderbt ligt / das sichs
nicht leiden wird /mit dem kopff hindurch wollen.

So wisset ihr auch wol/das Babst Adrianus/durch sei-
nen Legatē zu Turmberg/selbsbekant/das der Römische
stuel viel iamers ursache were/vnd erbot sich zur besserung/
Warumb wolt ihr euch denn/solchs zu bekennen/schemen/
vnd dazu noch steiff auff ewren stoltz beharren/nichts wei-
chen noch reunen/sondern alles mit gewalt haben / vnges-
acht/ob besserung odder ergerung draus folgen. Denn
ihr wisset/odder solt ia wissen/das Christlich regiment od-
der gewalt nicht zu verderben / sondern zu bessern / von
Gott eingesetzt ist/wie Paulus sagt/Vnd sol nicht eine ty-
ranney/sondern ein dienst sein/ So kündten wir als denn
 euch/bey dem voley/widderumb helfen heben. Denn ich
halt doch / ihr werdet der Lutherischen / als der frumen
Ketzer/auffs wenigst ihrs gebets/nicht wol emperen kön-
nen/solt ihr anders etwas bestendiges ausrichten. Wer
det ihr aber mit gewalt faren / steiff vnd halstarrig hin-
durch wollen (da Gott für sey) So bezeuge ich hie mit /
samt allen die mit mir glauben /für Gott vnd aller welt /
das vnser schuld nicht ist/wo euch ewr stoltz feylen wurde /
das ihr zu drummern gehet. Ewer blut sey auff ewrem
kopff / Wir sind vnd wollen vnschuldig sein /an ewrem
blut vnd verdammis /als die wir euch ewer missethat/gnug-
sam angezeigt/trewlich vermanet zur busse/herzlich gebe-
ten/vnd zu allem/das zu frieden dienet/auffs höchst erbo-
ten/Vnd nichts anders gesucht noch begert/denn den eini-
gen trost vnser seelen/das freye reine Euangelion/Also das
wir mit gutem gewissen rühmen mugen / Der man-
gel sey an vns nicht gewesen. Aber Gott
des friedens vnd trostes / gebe euch

seinen

seinen geist / der euch weise vnd fure
zu aller warheit / durch vnsern
lieben Herren Ihesum Chri
stum / Dem sey lob vnd
danc / fur alle seine
vnausprechli
che gnade vnd gaben in ewigkeit /

A M E N.

Bedruckt zu Wittenberg /
durch Joseph klug.
AD. D. XXX.

Faint, illegible text, possibly bleed-through from the reverse side of the page.

Vertrieben zu
Gottfried
1777

